

## Guijtz Nani Bacuaa Pabl Lo Rebeñ

### Roman

*Rucuaa Pabl lo rebeñ* guidoo nen guedx Roma

<sup>1</sup> Narä, Pabl, nacä te xmos Jesucrist, laani gule narä te gusule'ä xtidx Dios loj rebeñ.

<sup>2</sup> Agujc xchero bia'n Dios diidx loj renani basule' xtiidxni, suniidxni diidxre loonu, luxh diidx ni bia'n Dios caj lo guiitz xten reprof'e'tga. <sup>3</sup> Rediidx ni rusule'ä najc xcuent Jesucrist, Xi'n Dios, ni najc xagdooreii David xcuent tiejxhni. <sup>4</sup> Xcuent Xsprit Dxa Dad Jesucrist, najcni Xi'npac Dios. Badeed Dios yälrnibee lojni, ni'cni gubansacni lo rebeñgut. <sup>5</sup> Laani gucnäjni narä, guleni narä te gusule'ä xtiidxni te guzobdiajgtu, te chalilajz rebeñ ni rej guideb guedxliuj xtiidxni. <sup>6</sup> Luxh nadxaagtu loj rebeñ ni guleni te chalilajzreni xtiidxni.

<sup>7</sup> Ruxhalä guiitzre lojtu ni yu' guedx Roma, guiraatu ni sanälajz Dios ni bibeetu gactu beñdxan. Gacnäj Dios ni najc Xtdnu näjza Dad Jesucrist la'tu, guscuecdxireni lajztu.

*Rlajz Pabl chää guedx Roma*

<sup>8</sup> Ganidtoo rudedä xquixtios loj Dios con laj Jesucrist xcuent guiraatu, sa'csi guideb guedxliuj rujy beñ diidx xcuent xcälirilajztu. <sup>9</sup> Lagajc Dios anajn xho rniabä guetguejt xcuent la'tu lojni. Narä runä xtzuun Dios guideb lastoä, rusule'ä diidx xcuent Xi'nni Jesucrist. <sup>10</sup> Sanuutis canabä lojni, top sajc jädhuiä lojtu si'cni rlazä gunä agujc xchejli. <sup>11</sup> Sa'csi rlazduxhä fiä lojtu, te gacnäätu, te gulidxä la'tu xhi te xtidx Dios te sudzu'tzrutu lo xtiidxni.

<sup>12</sup> Nalajznu, te gustioobnu lajz sa'nu xcälrlililajz xtidx Dios xten sa'nu.

<sup>13</sup> Rebetzä rlazä gacbeetu balti huält benä xhigab jädhuiä lojtu, luxh gajd gacdi jäälä. Rlazä jädhuiä lojtu te chalilajz xhidajlru bejn xtidx Dios sigajcni salilajzreni guiralajt cadro hua'a loj rebejn ni di gac xpen Israel.

<sup>14</sup> Nungäjlpac gusule'ä xtidx Dios loj rebejn nani rni garen-garen didxsaj, sigajc loj reben griegw, loj renani nayääl, sigajc loj reben najn. <sup>15</sup> Rbaali lazä suga'a naj, te gusule' xtidx Dios näjza lojtu ni yu' guedx Roma.

### *Xcälrnibee xtidx Dios*

<sup>16</sup> Sa'csi dina guituiä xcuent xtidx Dios, sa'csi najcni yälrnibee xten Dios te guslaani lo dojl chutis bejn nani rlazj chalilajz xtiidxni, ganidtoo reni najc rexpejn Israel, dxejcti näjza rebejn ni di gac xpen Israel. <sup>17</sup> Sa'csi xtidx Dios rusule' xho nanab chalilajz te bejn te gacni te bensa'c nez lo Dios sa'csi huililajzni xtiidxni. Lo xtidx Dios caj scree: “Palga rililajz te bejn xtidx Dios, najcni te bennaya nez lo Dios, nabannäjni Dios xcuent xcälrlililajzni.”

### *Rextojl bejn*

<sup>18</sup> Xcälrdxe'ch Dios nani yu' xhaguibaa siajbni yejc rebejn nani gun dojl, nani rlazj gun cosguijdx, nani di gusaan guisieed sabejnreni didxgulii. <sup>19</sup> Sa'csi anancheereni nani sajg gan bejn xcuent Dios, ni'cni najreni rajpreni dojl, sa'csi ruluipac Dios na'c gunreni dojl. <sup>20</sup> Cheni birixtiejli guedxliuj, recos nani di gacdi fii bejn xcuent Dios, si'c xcälrnibeeni ni najc par tejpas, si'c xtujxh xtenni, huenliisi ruzenreni sa'csi ruluilojreni recos ni ruzen nani benchee Dios. Guiraa reni'c ruluiloj najcni Gueb Dios ni rajp yälrnibee par tejpas, ni'c di gacdi guiniireni loj Dios direni niembee xhini'c rlazj Dios gunreni. <sup>21</sup> Ni'cni, mase biembeerreni Dios, direni niliä'p

xpala'n<sub>ni</sub> te gan<sub>reni</sub> Gueb Dios, dizareni nudeed xquixtios lojni. Alga gualajz gujcreni, bicäy<sub>y</sub> xcäriejn<sub>reni</sub>, naareni hueen najc gunreni si'ctis ni jiajb yejcreni, si'cni rsia' lajzreni nen<sub>lastooreni</sub>. <sup>22</sup> Caniireni nanduxh<sub>reni</sub>, per direni gan, nayääl<sub>reni</sub>. <sup>23</sup> Gulälazreni xcälrdimbicha' Dios ni najc tejsi par tejpas, te bazuxhijb<sub>reni</sub> nez loj rebanäjb ni benchee naareni, ni najc guiraa ni rujn lojni si'c rujn lo te niguii ni rnitloj, näjza guiraa ni najc si'c reman ni rutajt, näjza guiraa ni najc si'c reman ni yu' tajp ni'ni, näjza ni najc si'c rebäjl.

<sup>24</sup> Ni'cni gulälaz Diosreni, basaanni gunreni si'ctis ni rlajzreni. Bejnreni dojl con resa'reni. <sup>25</sup> Sa'csi ahuililajzreni didx-xhii lacuaa nililajzreni xtidxlii Dios, ruzuxhijb<sub>zaren</sub> nez loj recos ni benchee Dios, lacuaa guzuxhijb<sub>reni</sub> loj Dios nani benchee guiraa rexhicos, Dios nacle' par tejpas. Sugacni si'c.

<sup>26</sup> Ni'cni gulälaz Diosreni, subia'n<sub>reni</sub> lo xcällatsiajreni, lo yälxtujy xtenreni. Diru regunaa guesnä<sub>y</sub> niguii, lagajc sagunaareni resnä<sub>y</sub>reni. <sup>27</sup> Sigajcza reniguii gulälaz regunaa, rujnreni dojl con lagajc saniguiireni. Luxh lagajc laareni siguijxreni latsiaj ni rujnreni.

<sup>28</sup> Luxh sa'csi di rlajzreni jiureni Dios, basaanti Dios suyu' cosguijdxtis xcäriejn<sub>reni</sub>, te chanuutisreni lo xcällatsiajreni, rujnreni recos ni xhet laadi. <sup>29</sup> Guidxareni dojl, näjza cosguijdx, näj yäl<sub>r</sub>uguilajz xhixten sa'reni; rugu'treni bejn<sub>reni</sub>, rujnreni yäl<sub>r</sub>siäblajz, rucuanä<sub>y</sub>reni resa'reni, rusgueereni sa'reni, rdxechnä<sub>y</sub>reni sa'reni, rniizareni didxxhii. <sup>30</sup> Rniyaj sa'reni, rdxe'chreni lo Dios, gualajzreni, dipacreni guitujy, rliä'preni lagajc xpala'n<sub>reni</sub>, entis latsiacoob rbäxtiejreni, gualajzreni lo xcuza<sub>y</sub>reni, <sup>31</sup> nadduxh<sub>reni</sub>, xheti xcäriejn<sub>reni</sub>, xhet sajcdi xtiid<sub>x</sub>reni ni ria'n<sub>reni</sub> lo sabejn<sub>reni</sub>, direni chanälajz sa'reni si'cni nungäjl gacni, dizareni gulaslajz

sa'reni. <sup>32</sup> Luxh mase agucbeereni gun Dios yälguxhtis lojreni, najnzareni nungäjł guetpac renani rujn recosre, nicla jiureni, rujnreni guiraa recosguijdxre, luxh rbaali lajzreni richunäjreni rebejn ni rujnza recosguijdxga.

## 2

### *Dios rujn yälguxhtis con didxguliipac*

<sup>1</sup> Ni'cni, ¿canejz chäätu, la'tu benguedxliuj? Chutis luj ni rgubeelu sabejnlu, lagajc si'c cubezareni luj, lagajc xcuent ni'c sajclu yälguxhtis, sa'csi luj rgubeelu sabejnlu, lagajcza luj rujnlu lagajc dojlga. <sup>2</sup> Nancheenu sujn Dios yälguxhtissa'c loj renani rujn sa' dojlga. <sup>3</sup> Ben guedxliuj ni rgubee loj renani rujn dojl, luxh sigajcza rujnlu, ¿la rujnlu xhigab sidedcaj gun Dios yälguxhtis lojlu xcuent xtojllu, ä? <sup>4</sup> O ¿la rbälazlu ni rujn Dios, najcni huenduxh, lacti guroob najc xcäl'rulaslajzni, rapduxhzani pasens? ¿La dilu gan dee najc ni gacnäjlu gusiechlajzlu te guibicajlu lo dojl, ä? <sup>5</sup> Luxh sa'csi nadduxhlu, di lastoolu guigoodz te gusiechlajzlu, cagutajllu yälguxhtis ni gaclu che guidzujn dxej ni gun Dios yälguxhtis loj reben guedxliuj, <sup>6</sup> siguijx Dios loj tejgatu xcuent dzuun nani bejn tejgatu. <sup>7</sup> Loj rebejn nani rlajztisreni guibaŋsa'c, ni gusoob xtiidxni, sudeed Dios yäl'nabajn par tejpas sa'csi gudiilreni xhaniduj näjza go'preni xpala'nreni loj Dios, rlajzreni guibajnreni loj Dios par tejpas. <sup>8</sup> Luxh sidxe'ch Dios, sidxe'chduxhni loj renani sanälajz lagajc laareni, nani di jiu xtidxguliini, alga rusooobreni reyällatsiaj, redidxguijdx. <sup>9</sup> Guiraa reben guedxliuj ni rujn dojl sidejd trabajwdxh näjza sac-huin lastooreni; ganid rexpen Israel, dxejcti näjza reben griegw. <sup>10</sup> Loj guiraa rebejn nani rujn coshween, sudeed Dios xhaniduj, näjza bala'n, näjza yäl'r-becdxi lastooreni, ganid rexpen Israel, dxejcti näjza reben griegw.

<sup>11</sup> Sa'csi tebloj najc guiraasi rebejn nez loj Dios. <sup>12</sup> Guiraa rebejn nani bejn dojl, luxh direni niembee xleii Dios, sinitlojreni sin leiiga; guiraa reni biembee xleii Dios, lagajc con leiiga sujn Dios yälguxhtisreni xcuent xtojlreni. <sup>13</sup> Xhet ganaxdi renani rucudiajgtis xleii Moisés najc bennaya nez loj Dios; rebejn ni rusoobpac rexleii toMoisés, reni'c najc bennaya loj Dios. <sup>14</sup> Yu' xhidal bejn ni di gumbee xleii toMoisés, dizareni gac rexpen Israel, rujnreni recos ni caj lo leii. Najnreni xhini'c najc cos sa'c. Ni'cni lagajc xcäriejnreni najc si'c leii par laareni. <sup>15</sup> Recossa'c ni rujnreni ruluiloj nezyusa'c ni yu' lastooreni. Xcäriejnreni ruluiloj xhini'c loj guiraa nani rujnreni najc cos sa'c, xhini'c najc dojl. <sup>16</sup> Guiraa recosre sajc che guidzujn dxej ni gun Dios yälguxhtis guiraa rehxigabxhiga'tz ni yu' lastoo rebejn. Jesucrist gac juejz lojreni, dxejc sisiojb guiraa rediidx ni cagusule'ä lojtu.

### *Rexpen Israel näj xleii toMoisés*

<sup>17</sup> Luj ni laalu xpen Israel, ni rniilu sanäpaclu xleii toMoisés, rniduxhlu najclu xpen Dios, <sup>18</sup> rniilu nancheezalu xhini'c rlajz Dios gunlu, anajnzalu xhini'c najc hueenru sa'csi bisiedsa'cpaclu leii. <sup>19</sup> Rchalolu sajc guluiilu nezyusa'c lo rebejn nani najc si'c lotiä'p, sajc guzanijlu xcäriejn reni nacäy xcäriejnreni. <sup>20</sup> Rchalolu najclu maestr lo renani nayääl, najczalu maestr lo rebiuux, sa'csi nansa'clu leii, luxh lojni caj guiraa yäl'najn näjza guiraa didxguliipac. <sup>21</sup> Ni'cni rniä lojlu, luj ni caguseed xtee bejn, ¿xhicuent dilu guseed lagajc luj? Luj ni rusule'lu diidx na'c cuan bejn, ¿xhicuent rbajnlu? <sup>22</sup> Luj nani rniilu na'c guesnäjni te ni di gac chääl'ni, ¿la resnäjlu nani di gac chäällu, ä? Rdx'e'chlu xcuent rebanäjb, ¿xhicuent rbääl'u xhicos nejn xquidoo rebanäjb, ä? <sup>23</sup> Luj rlajzlu chä'p

xpala'nlu sa'csi najnlu leii, ¿la rusanxtujylu Dios sa'csi dilu gusoob xtidx leiiga, ä? <sup>24</sup> Bahuii xho rebejn nani di gac xpen Israel rniyajreni Dios sa'csi la'tu ditu gusoob xtiidxni, rujntu dojl, sigajc ni caj lo xtidx Dios.

<sup>25</sup> Palga la'tu chutu bee si'cni caj lo leiiga, palga gu-soobtu guiraa diidx ni caj lo leii, laaca. Luxh palga ditu gusoob guiraliipac xtidx leiiga, xlia'si guyu'tu bee, sa'csi rujntu dojl. <sup>26</sup> Ni'cni palga te bejn ni di chu beega, luxh rusoobni guirliipac xtidx leiiga, ¿la di gacdi guchaagni cuent najcni si'c te nani yu' beega, ä? <sup>27</sup> Bejn nani di chu beega, luxh rililajzni guiraliipac xtidx leiiga, sujnni yälguxhtis la'tu sa'csi mase yu'tu beega, luxh nanduxhtu leiiga, ditu gusoob xtidx leiiga, alga rujntu dojl. <sup>28</sup> Sa'csi xhet guiraadi rebejn ni yu' beega najc rexpejn Israel, luxh di beega ni ru' bejn gun gusoobpac bejn xtidx leiiga. <sup>29</sup> Najcpac te xpen Israel nani najcni nen lastooni, nani yu' bee lastooni, rusoobpacni xtidx Dios xcuent Sprit xteni, dini gunni sa'csi najctisni costumbr. Dios ni siliä'p xpala'nni, xhet bejndi.

### 3

<sup>1</sup> ¿Xhini'c sacnä j te bejn najcni te rexpen Israel, ä? O ¿xhi sajchuni beega? <sup>2</sup> ¡Empac sacduxhni! Ganidtoo, sa'csi loj rexpen Israel badeed Dios xtiidxni. <sup>3</sup> Mase yu' renani di nililajz diidxga, ¿la ni'cni xhet sajcdi diidx ni bia'n Dios loj rexpejnni, ä? <sup>4</sup> ¡Xho gacni si'c! Diostis najc guliipac, guiralii bejn rusguee. Scree caj lo xtidx Dios: Lagajc xtiidxlu suluii laaca rujnlu, te che gaclu yälguxhtis, nicla tej xtojllu di guidxäjl.

<sup>5</sup> Palga xcällatsiajnu ruluiiru najc Dios huenduxh, ¿xhini'c guiniinu dxejc? Palga gun Dios yälguxhtis nurnu, dxejc tednu trabajwduxh, ¿la rujnni latsiaj loonu, ä?

(Caniä si'c te be<sub>n</sub> guedxliuj naj.) <sup>6</sup> ¡Xho gacni si'c! Paru najcni si'c, ¿xho mood gun Dios yäl<sub>g</sub>uxhtis loj rebej<sub>n</sub> guedxliuj?

<sup>7</sup> Paru redidx-xhii ni rniä riliä'pru xpala'n Dios näjza xtidxliini, ¿xhicuent gunni yäl<sub>g</sub>uxhtis narä si'c te be<sub>n</sub>-doj<sub>l</sub>? <sup>8</sup> Yu'za bej<sub>n</sub> ni canii didx-xhii, najreni cayäjpnu lo rebej<sub>n</sub>: “Colyejn cosguijdx te guiluilojni recoshuen.” Per rebej<sub>n</sub> ni canii si'c sidzuj<sub>n</sub> dxej gacreni yäl<sub>g</sub>uxhtis.

*Guiraanu najcnu be<sub>n</sub>doj<sub>l</sub>*

<sup>9</sup> ¿Dxejca'? ¿La najcnu be<sub>n</sub>huenduxhru lojreni, ä? Dini gac; tebloj abile'cnu yäl<sub>q</sub>uij xten rexpen Israel con rebej<sub>n</sub> ni di gac xpen Israel, sa'csi guiraareni yu'reni lo doj<sub>l</sub>.

<sup>10</sup> Si'cni caj lo guijtz:

Ruti te be<sub>n</sub>sa'c, nicla tejni.

<sup>11</sup> Ruti te bej<sub>n</sub> ni racbee,  
ruti chu tej nani rguil Dios.

<sup>12</sup> Guiragajcreni abirii lo xnejz Dios,  
teblojsi xhet sajcdireni.

Ruti chu tej ni rujn cossa'c, nicla tejni.

<sup>13</sup> Ro'reni rii ganax didxguijdx,

najcni si'c te baa ni naxal,  
rusgueereni con lujdxreni,

didxlatsiaj rii ro'reni najcni si'c benen<sub>n</sub> ni yu' ro' te bäl-  
nialajz.

<sup>14</sup> Ro'reni entis cague,  
entis canii didxrdxe'ch lo sa'reni.

<sup>15</sup> Ni'reni ruxu<sub>n</sub>li saxhe' xtiejn sa'reni.

<sup>16</sup> Cadrotis rijreni rujnreni latsiaj,  
ruteedreni sa'reni trabajw.

<sup>17</sup> Direni gumbee nezyuj ni ruscuecdxilajz.

<sup>18</sup> Niclaza guidxelojreni Dios.

<sup>19</sup> Racbeenu najc rediidx nani caj lo xleii Dios par rebejn ni rnibee leii lojreni, te jiäuu ro' guiralii rebejn, te guiraa reben guedxliuj gacbeereni yu' xtojlneni nez loj Dios. <sup>20</sup> Sa'csi mase gusoob bejn guira'ti diidx ni caj lo leii, di leiiga gudzucaj xtoj bejnga, sa'csi leiiga najc nani guluii dojl ni yu' nen lastooni.

**Rus**laa Dios lo dojl xcuent yälirililajz xtiidxni

<sup>21</sup> Naj ruluii Dios stee mood guibicaj xtojlnu, nani di gac mood ni caj lo xleii toMoisés. Luxh galooli gusloj canii Dios xcuent nezyujre, cajni lo reguijtz xten leii näjza lo reguijtz ni bejn rebejn nani gunii xtidx Dios galoo. <sup>22</sup> Stee mood najc scree: Chutis ni chalilajz xtidx Jesucrist, sajc naya lastooni nez loj Dios; si'c sajc garaliiza nani salilajz, sa'csi tebloj najcnu nez lojni. <sup>23</sup> Sa'csi guiralii rebejn guedxliuj abanijt lo Dios, direni guiga' guidzujnreni lo xnezyuj Dios. <sup>24</sup> Niluxh balaslajz Dios nuunu, banidxxlia'ni loonu yäl nabannaya nez loj Dios sa'csi Jesucristis gudijx yälguxhtis xten dojl che baxhe'ni xtiejn ni lo cruzj te badzucajni xtojlnu. <sup>25</sup> Baxhał Dios xi'nni, Jesucrist, te cuajni lo cruzj nez loj rebejn te si'c gudijxni guiraa rextojl chutis bejn ni rililajz xtidx Dios xcuent xtiejn Jesucrist. Si'c bejn Dios te guluiini xho guibannaya bejn lojni. Galoo gojptis Dios pasens rebejn, dini niujn yälguxhtis rextojlneni, <sup>26</sup> sa'csi acanajn Dios guc gunni yälguxhtis redojlga, te si'c guiluini xcälñayani nez loj guiraa rebejn, te Diospac gunnaya nez lojni chutis ni rililajz xtidx Jesucrist.

<sup>27</sup> Ni'cni ¿con yälñaro? ¿Con yälbindaan? ¿Xhet sajc-dini! ¿Xhi leii rudzucaj xtojlnu? ¿La leii najc ni rnii jiennu dzunsa'c, ä? ¿Dini gac si'c! Yu' tejtis leii ni rudzucaj dojl, nani rnii chalilajztis bejn xtidx Jesucrist. <sup>28</sup> Dxejc sajc guiniä lojtu chutis bejn sajc gac naya nez loj Dios sa'csi

rililajzni xtidx Jesucrist, xhet sa'csi rujnni redzunsac ni caj lo leii.

<sup>29</sup> ¿La najc Dios Xtiooztis rexpenn Israel, ä? ¿La dini gac najza Dios xten rebejn ni di gac xpen Israel? ¿Xho dini gac! Najcni Dios xten guiroc cuaa bejn. <sup>30</sup> Ruti chu stee Dios, tejtis Dios yu'. Ruslaani lo dojl rebejn ni guyu' bee sa'csi huililajzreni xtiidxn, sigajcza ruslaani lo dojl rebejn ni xhet beedi guyu' sa'csi huililajzreni xtiidxn. <sup>31</sup> ¿La rudzucajnu leii sa'csi rililajznu, ä? Ajndi. ¿Xho gacni si'c! Alga basoobnu xtidx leiiga che huililajznu xtidx Jesucrist.

## 4

### *Xcälrlilajz toAbram*

<sup>1</sup> ¿Xhini'c sajc guiniinu xcuent toxtadgoldoonu, Abram? <sup>2</sup> Paru niajc toAbram bejnaya nez loj Dios por redzuun ni bejn, pet sajc guibalazduxhni, per xhet nez lojdi Dios. <sup>3</sup> ¿Xhini'c caj lo xtidx Dios? Caj rediidxre: Huililajz toAbram xtidx Dios, ni'c bachaag Dios cuent najcni te bejnaya nez lojni.

<sup>4</sup> Meel nani rca' te bejn ni rujn te dzuun, meelga najc ni riäjl xca'ni, xhet rcaxlia'dinini. <sup>5</sup> Luxh nani rililajztis xtidx Dios ni ruslaa bejn lo dojl, lacuaa naani yu' xhi dzuun sajc gunni te guibicaj xtojlni, bejnnga najc te bejnaya nez loj Dios, sa'csi huililajzni xtiidxn. <sup>6</sup> Sigajcza naj toDavid, chicbaa bejn nani ruchaag Dios cuent najcni te bejnaya luxh di niqiin niujnni redzuun ni caj lo leii. Räjpn:

<sup>7</sup> Chicbaa renani abaslaa Dios lo xtojlni, renani abiäuu loj xtojlni.

<sup>8</sup> Chicbaa bejn nani diru Dios gun cuent xtojlni.

<sup>9</sup> ¿La sajc guiniini chicbaa rebejntis nani guyu' bee, ä? ¿La et najdiza renani di niu' bee, ä? Sa'csi rniinu: "ToAbram gujc te bejnaya nez loj Dios sa'csi huililajzni

xtidx Dios.” <sup>10</sup> Guc bidxaag cuent najcni te beñnaya nez loj Dios ¿che gajdni chu bee, ä? O ¿Laa che guyu'ni bee? Bidxaagpac xcuentni che gajdni chu bee. <sup>11</sup> Dxejcti guyu'ni bee si'c te seen xten yälñaya sa'csi huililajzni xtidx Dios che gajdlini chu bee te gacni xtad guiraa renani rililajz laḷ ni xhet beedi yu'reni, te näjza laareni guidxaag cuent najczeni beñnaya nez loj Dios, <sup>12</sup> te gaczani xtad guiraa renani yu' bee ni huililajzza xtidx Dios si'c huililajz toAbram cheni gajdni chu bee.

*Diidx ni bia'n Dios rsiojb xcuent yälñrililajz*

<sup>13</sup> Bia'n Dios diidx loj toAbram näjza loj rexagdooni, xca'ni guedxliujre si'c yälñasa'c xtenni. Xhet sa'csi gusoobni xtidx leii xca'nini, sica'nini sa'csi najc toAbram te beñnaya nez loj Dios sa'csi huililajzni xtidx Dios. <sup>14</sup> Sa'csi paru renani rusoob xtidx leiiga najc nani xca' yälñasa'cga, xlia'si chalilajz bejñ xtidx Jesucrist, luxh xhetza sajcdi diidx nani bia'n Dios loj toAbram. <sup>15</sup> Che yu' te leii, luxh yu' chu di gusoobni, dxejc rdxe'ch Dios loj bejñ. Cadro xheti leii, xhetiza xtojñreni.

<sup>16</sup> Ni'cni balaslajz Dios nuunu, te sudzu'tz diidx ni bia'nni loj toAbram, te guiraa rexagdooni ni rililajz sica' yälñasa'c, xhet xtebtis renani sasanäj xleii toMoisés, nägajcza renani rililajz xtidx Dios si'c huililajz toAbram, nani najc xtad guiraanu nani chalilajz xtidx Dios. <sup>17</sup> Si'cza caj lo xtidx Dios, caj rediidxre: “Abenä gaclu xtad xhidal renación.” Si'c bia'n Dios diidx loj toAbram, Gueb Dios nani gudeed yälñabajñ loj rebengut, nani rnii xcuent recos nani gajd gac ascanu ala najcni.

<sup>18</sup> Anajn toAbram naganduxh soob diidx ni bia'n Dios con laani, luxh laani empac huililajzni, ni'c gujcní xtad xhidajl nación, te gusojb xtidx Dios ni guniini che räjpni: “Scree gac xhidajl rexagdoolu.” <sup>19</sup> Di toAbram nunijt

xcälirililajzni, mase ayu'ni tegayuu ijz, najnni anajcni bengool, luxh sigajcza Sara abengool diru xi'nreni chu.

<sup>20</sup> Dini niun-tio'p lajzni xcuent rediidx nani bia'n Dios con laani, alga gusutijpruni huililajzni xtiidxni, gulä'pni xpala'n Dios, badeedni xquixtios lojni. <sup>21</sup> Anajnni rajp Dios yälrnibee te gunni guiralii nani bia'n diidx gunni. <sup>22</sup> Ni'c bachaag Dios cuent najcni te beñnaya nez lojni sa'csi huililajzni xtidx Dios.

<sup>23</sup> Xhet xtebtisdi xcuent toAbram cuaj rediidxre: “Bidx-aag cuent najcni te beñnaya nez loj Dios sa'csi huililajzni xtidx Dios”, <sup>24</sup> näjza xcuentnu cuajni, sa'csi che chalilaaznu xtiidx nani baspañsac Xtað Jesucrist loj rebengut, sidxaag cuent najcnu beñnaya nez loj Dios. <sup>25</sup> Bacuaareni Jesucrist lo cruju te gudijxni rextojlñu nez loj Dios, luxh gubañsacni lo rebengut, te gac gacnu beñnaya nez loj Dios.

## 5

*Xhi rsiajc bejn* che najcreni beñnaya nez loj Dios

<sup>1</sup> Ni'cni che rililajznu xtidx Dios rudzucaj Jesucrist xtojñu rajcnu beñnaya nez loj Dios, ni'cni ruscuecdxini lajznu. <sup>2</sup> Sa'csi gujt Jesucrist, sa'csi gubañsacni lo rebengut xcuent nuurnu, che rililajznu xtidx Dios xcuent Jesucrist, rulaslajz Dios nuurnu, ni'cni rbalajznu, rajpnu yälñabajñ, su'pacnu lo xcälrdimbicha' Dios. <sup>3</sup> Luxh xhet ni'ctis, sajcza guibalaaznu che tednu trabajw, sa'csi najnu trabajwga sujn jia'pnu pasens. <sup>4</sup> Luxh che rajpnu pasens rajcnu te benguyajlru; che anajczanu benguyajl, rililazsa'cruunu. <sup>5</sup> Luxh yälirililazsa'cnu dini gusanxtujy, sa'csi yälñanälajz ni rajp Dios ruchaj lastoonu sa'csi neñ lastoonu rbäjz Xsprit Dxan xten Dios ni baniidxni loonu.

<sup>6</sup> Lañ ni xhetliidi sajcdi jiennu lagajc xcuentnu te guibicaj xtojñu, che basa' dxej biääd Jesucrist te gujtni lo cruju

xcuent rebendojĵ. <sup>7</sup> Guliipacni, naganduxh guidxälni te bejn ni xcäjb guet lacuaa te bejn ni laaca rujnni. Per sidxäjĵ te bejn ni xcäjb guet lacuaa te beŋsa'c. <sup>8</sup> Luxh Dios baluiloj xcälrinälajzni xcuent nuurnu sa'csi laĵ ni yugajcnu lo doĵĵ, gujt Jesucrist lo cruzj xcuentnu. <sup>9</sup> Aticaxh naj ni najcnu bennaya nez loj Dios sa'csi baxhe'ni xtiejnĵni te gubicaj xtojĵnu, naj sidedcaj gacnu xcälguxhtis Dios. <sup>10</sup> Palga laĵ ni rdxe'chnu lo Dios, basiäjĵni lajzni xcuentnu sa'csi gujt Xi'nni lo cruzj, naj ni abiäjĵ lajzni, suslaani nuure lo doĵĵ sa'csi gubaŋsac Xi'nni loj rebengut. <sup>11</sup> Luxh xhet ni'ctis, sibalaznäjnu Dios xcuent Dad Jesucrist, sa'csi xcuentni ara'pnu yälrbedxi lajzni nez loj Dios.

### *Adán con Dad Jesucrist*

<sup>12</sup> Ni'cni, xcuent tejtis niguii biu' doĵĵ lo guedxliuj, luxh xcuent doĵĵ biäädza yälgujt, gudejdti yälgujt loj guiraa rebejn, sa'csi guiraa rebejn bejnreni doĵĵ. <sup>13</sup> Cheni gajd xleii toMoisés chu lo guedxliujre, alabejn rebejn doĵĵ, per di niajcdi nucuaquijni rebejn sa'csi xheti leii. <sup>14</sup> Luxh empac gujt rebejn nen redxej ni gubajn toAdán hasta redxej ni gubajn toMoisés, mase direni niujn lagajc doĵĵ nani bejn toAdán; luxh ruluiloj yu' chu stee bejn nungäjĵ jiäd.

<sup>15</sup> Luxh nani runidx-xlia' Dios dini gac si'c najc xtojĵ toAdán. Dini gac si'c sa'csi palga xcuent doĵĵ ni bejn toAdán, gujt xhidalduxh bejn, cuantimaaz naj sunidx-xlia' Dios yäl nabajn par tejpas loonu por xcälrulaslajz Dios, nägajc por xcälrulaslajz Dad nani laa Jesucrist. <sup>16</sup> Luxh nani runidx-xlia' Dios loonu dini gac si'c yälrunijt ni biäd loonu xcuent doĵĵ ni bejn toAdán; sa'csi xcuent tejtis doĵĵga biäd yälgujhtis xten Dios, sa'csi guiraliiza rebejn guedxliujre yu' lo doĵĵ, per xcuent nani banidx-xlia' Dios, nalajznu, gujt Xi'nni Jesucrist lo cruzj, ni'c gujc

sa'csi yuduxhtej dojl, te xcuent ni bejn Jesucrist sajc gac bejn bennaya nez loj Dios. <sup>17</sup> Palga xcuent dojl ni bejn tejsi bejnga gunibee yälgujt lo guiraa bejn, cuantimaaz lo yäl nabajñ par tejpas sinibee guiraa reni rca' xcäl rulaslajz Jesucrist näjza renani rcaxlia' lojni yäl racnaya nez loj Dios.

<sup>18</sup> Ni'cni sigajc ni biääd yäl guxhtis lo guiraa reben guedxliuj xcuent dojl ni bejn tejsi niguii, sigajcza sa'csi basoob stee niguii xtidx Dios, xhidal bejn gujc bennaya nez loj Dios, cua' reni yäl nabajñ par tejpas. <sup>19</sup> Nalajznu sigajc ni baniyt xhidalduxh bejn nez loj Dios xcuent tej niguii ni di nusoob xtidx Dios, sigajcza xhidalduxh bejn sajc bennaya nez loj Dios xcuent tej niguii ni basoob xtiidx Dios. <sup>20</sup> Ni'cni badeed Dios xleii to Moisés, te guzenru dojl. Niluxh cadre guyuduxh dojl, ro'c nanabza chuduxhru xcäl rulaslazduxh Dios, <sup>21</sup> te sigajc ni gunibee dojl guyu' yäl gujt, sigajcza guinibeeru xcäl rulaslajz Dios te jia'cnu bennaya nez loj Dios, te xca'nu yäl nabajñ par tejpas xcuent Xi'nni, Dad Jesucrist.

## 6

*Agujtñu lo dojl* per nabaññajñu Jesucrist

<sup>1</sup> ¿Xhini'c guiniinu, naj? ¿La sajc guidxunrunu lo dojl te tioobru xcäl rulaslajz Dios, ä? <sup>2</sup> ¿Gurniälojtu gacni si'c! Nuurnu najcnu si'c te bengut lo dojl sa'csi rililajznu xtidx Dios; ¿xhoxh gac guibajñrunu lo dojl? <sup>3</sup> ¿La ditu gan, che gurobnisnu con laj Jesucrist, najcni si'c ni näjza nuurnu gujtñu si'c ni gujt Jesucrist? <sup>4</sup> Sa'csi che gurobnisnu bigatznäjnumi si'c lo yäl gujt, te sigajcni huäjs Jesucrist lo yäl gujt xcuent xcäl rnibee Dios, sigajcza näj nuurnu sajc guidxunnu lo te yäl nabañcoob.

<sup>5</sup> Sa'csi palga gujcnu tejsi con laani lo xcäl gujtñi che birobnisnu, sigajcza sajcnu tejsi con laani lo yäl nabañsac

lo rebengut. <sup>6</sup> Ni'cni xcärienbiejwnu cuaj lo cruzj con laani, te badzucajni rextojl̄nu, te di gacdiru guinibee dojl̄ loonu. <sup>7</sup> Sa'csi nani agujt, di gacdiru guinibee dojl̄ lojni. <sup>8</sup> Palga nuurnu agujt̄nu con Jesucrist, rililaaznu sibansaczanu con laani. <sup>9</sup> Sa'csi nadonpacnu gubansac Jesucrist loj rebengut, ni'c diruni guet, diru yäl̄gujt ga'p yäl̄rnibee lojni. <sup>10</sup> Che gujt Jesucrist, gujt̄ni xcuent dojl̄, luxh diru gacdi guinibee dojl̄ laani par tejpas; naj̄ ni gubansacni, nabaj̄nni nez loj Dios. <sup>11</sup> Ni'cni la'tu colguchaag cuent najct̄u si'c te bengut lo dojl̄, luxh nez loj Dios, colguchaag cuent nabann̄aj̄tu Jesucrist.

<sup>12</sup> Ni'cni na'c gusaantu guinibee dojl̄ tiejxhtu te guntu si'ctis ni rlajz tiejxhtu. <sup>13</sup> Na'cruza gusaantu jiajb guideb lagaa tiejxhtu lo dojl̄ te guntu cosguijdx. Maazru hueen colgudeed tiejxhtu lo Dios si'c te bejn̄ nani gubansac lo rebengut, naj̄za colgudeed guideb lagaa tiejxhtu te guntu recoshueen si'c ni rlajz Dios guntu. <sup>14</sup> Sa'csi diru dojl̄ guinibee lojtu, sa'csi dirutu chu loj xleii toMoisés, sa'csi yu'tu lo xcäl̄rulaslajz Dios.

### *La'tu najc si'c remos*

<sup>15</sup> ¿Xho gacni naj̄? ¿La sajc jienrunu dojl̄ naj̄ ni dirunu chu lo leii sa'csi yu'nu lo xcäl̄rulaslajz Dios, ä? ¿Xho gacni si'c! <sup>16</sup> La'tu nansa'ctu palga yu'tu si'c te mos loj te lam̄ te gusobdiajgtu xtiidxni, najcpactu xmos bejn̄ nani rusoobtu xtiidxni. Ni'cni, palga gusoobtu xtidx dojl̄, ni'c najc xlam̄tu, ni'c siädñä yäl̄gujt lojtu. Palga gusoobtu xtidx Dios, ni'c najc xlam̄tu. Dxejc sajct̄u benn̄aya nez loj Dios. <sup>17</sup> Xquixtios lo Dios, galoo gujct̄u xmos dojl̄, per naj̄ guideb lastootu basobdiajgtu xtidxcoob Dios, huililajz̄tu xtiidxni ni basule'nu lojtu. <sup>18</sup> Luxh agulaatu lo dojl̄, biädjiajct̄u xmos Dios lo dzunsa'c. <sup>19</sup> Narä cagusule'ä diidx con sa' didx guyasire sa'csi gajdt̄u gacbesa'c xho najc xnezyuj

Dios. Che gujctu xmos dojl, guideb lagaatu bejntu dojl, bejntu latsiaj, luxh ni'c satajltis latsiaj ni bejntu. Naj ni najctu xmos Dios lo dzunsa'c, guideb lagaatu colyejnru dzunsa'c, te si'c sidajlru dzunsa'c ni guntu sa'csi najctu bennaya nez loj Dios.

<sup>20</sup> Sa'csi che gujctu xmos dojl, di rextidx Dios guinibee la'tu. <sup>21</sup> Naj, ¿xhini'c bejntu gaan che gujctu xmos dojl, bejntu recos ni rtuinajtu naj? Ni xnezyuj recosga rdzujn loj yälgujttis. <sup>22</sup> Per naj, sa'csi agulaatu lo dojl, abiu'tu najctu xmos Dios, sujntu sajctu bennaya nez loj Dios, luxh xnezyuj recoscoobre rdzujn lo yäl nabannaj Dios par tejpas. <sup>23</sup> Xcälrajx xten dojl najc yälgujt, per nani runid-xlia' Dios najc xcäl nabannaj Dios par tejpas xcuent ni bejn Jesucrist xtadnu.

## 7

### *Yälrluui ni rudeed yälguçnaa*

<sup>1</sup> Caniä lojtu ni najn xleii toMoisés. ¿La ditu gan, resa'ä, xleii toMoisés rnibee loj te bejn guideb nabajnni lo guedxlijre? <sup>2</sup> Najcni si'c te gunaa nani bachnaa te niguii. Nanabpac cuäznajni chäälni guideb nabajnni. Si'c rnibee leiiga. Palga guet chäälni, diru gacdi guinibee leiiga lojni xcuent chäälni. <sup>3</sup> Ni'cni, laj ni nabajn chääl gunaaga, palga cuäznaj gunaaga ste'ca niguii, cayujnni dojl sirilajni gunaguijdx. Palga agujt chääl gunaaga, agulaani lo leiiga, sajç guçnaani stee niguii, xhet dojldi cayujnni, dizani guirilaj gunaguijdx.

<sup>4</sup> Ni'cni la'tu, rebetzä, sigajcza agulaatu lo leiiga, sa'csi najcni si'cni gujctu si'c bengut lo leii che gujt Jesucrist lo cruz, te naj sajç jiu'tu lo ste'ca bejn, loj lagajc Jesucrist nani gubansac loj rebengut te sajç jiennu redzunsa'c ni rlanj Dios jiennu. <sup>5</sup> Sa'csi laj ni gubajnnu lo yäl nabañ-biejwga, lagajc rediidx nani nii leiiga di gacdi gun bejn,

lagajc recosga rlazj gun tiejxhnu, luxh si'c sozaatisnu lo xnezyuj yälgujt. <sup>6</sup> Naj abiriinu lo leiiga, sa'csi agujtnu lo leiiga nani gunibee loonu galoo. Naj con xpritcoob ni yu' neñ lastoonu yu'nu lo Dios, xhet con xcärienbiejwdi ni gojpnu che nanab gusoobpacnu leii.

*Redojl* nani yu' tiexhä

<sup>7</sup> ¿Xhixhni'c guiniinu naj? ¿La dojl najc leii, ä? ¿Xho gacni si'c! Palga dina niembeä xhi caj lo leiiga, dizana niacbeä cayunä dojl. Dina niacbeä cayunä dojl che rlazä xca'a xhixten ste'ca bejn palga dina niolä lo leii rediidxre: “Na'c chuguij lajzlu rehxixten bejn.” <sup>8</sup> Ni'cni lagajc diidx ni caj lo leiiga bejn guyuguij lazä rehxixten bejn sa'csi nancheä najcni dojl. Paru xheti leii, xhetiza dojl, agujtni. <sup>9</sup> Galoo gubanä xhet leiidi nanä, luxh che biääd diidx ni rnibee leii, gucbeä xhini'c najc dojl, dxejc banitä lo Dios, si'c ni gutä. <sup>10</sup> Luxh baxhañ Dios leiiga loonu te jiuäni, te xca'ä yäl nabajñ, luxh alga bazenni benä dojl, banitä nez loj Dios, gutäti dxejc. <sup>11</sup> Con leiiga, basguee dojl narä, bejn ni narä si'c te bengut nez loj Dios.

<sup>12</sup> Ni'cni, leii najc dxan, näjza rediidx ni caj lo leiiga najc dxan; hueen najcni, didxgulii najcni. <sup>13</sup> ¿Dxejca'? ¿La nani najc te coshuen huinä narä lo yälgujt, ä? ¿Xho gacni si'c! Dojl najc ni huinä narä lo yälgujt. Te si'c xcuent leiiga ni nasa'c, jienlojni dojlpac najc dojl sa'csi bagu'tni narä con te coshuen, te lagajc rediidx ni caj lo leiiga jienloj lacti latsiaj najc dojl.

<sup>14</sup> Sa'csi nadonnu leiiga najc xtidx Dios, luxh narä nacä te beñ guedxliujre, nacä xmospac dojl. <sup>15</sup> Sa'csi dina gacbeä xhini'c runä. Dina gunä recos nani rlazä gunä, alga cayunä latsiaj nani dipacna rlazä gunä. <sup>16</sup> Naj palga narä runä latsiaj nani dipacna rlazä gunä, lagajcza ni'c rului hueenca najc leii. <sup>17</sup> Naj, diruni gac narä ni cayujn

latsiaj, sa'csi yu' dojl neṅ lastoä, ni'c ni cayujn runä latsiaj. <sup>18</sup> Sa'csi narä nanä neṅ lastoä, nalajznu lo tiexhä, xhetliidi cossa'cdi yu'; sa'csi rlazä gunä cossa'c, per dina gacdi pä te gunäpac recossa'cga. <sup>19</sup> Sa'csi dina gunä redzunsä'c nani rlazä gunä, alga latsiaj nani diru rlazä gunä, ni'c runä. <sup>20</sup> Ni'cni palga runä latsiaj nani diru rlazä gunä, xhet narädi runäni, dojl ni yu' tiexhä, ni'c ni cayujn runä latsiaj.

<sup>21</sup> Ni'cni narä, nani rlazä gunä redzunsä'c, rdxälä leiire: yu'pa dojl tiexhä. <sup>22</sup> Sa'csi neṅ lastoä, rlazäpac gusobä diidx xten xleii Dios. <sup>23</sup> Luxh ruhuiä garenca leii yu' guideb lagaa tiexhä, ruchagdijlni leii ni yu' xcärienä, ruteedzani narä ladzṅaa xleii dojl nani yu' guideb lagaa tiexhä.

<sup>24</sup> ;Proobza narä! ;Chuni'c gusḷaa tiexhä ni nungäjḷ guet xcuent dojl? <sup>25</sup> ;Xquixtios loj Dios sa'csi Dad Jesucrist sajc gusḷaa nuurnu lo dojl! Ni'cni con xcärienä rusobä xtiidx Dios, yu'ä lo xleii Dios, niluxh tiexhä rlazj gusoob xtiidx dojl, chuni lo xleii dojl.

## 8

*Yälṅabajṅ* ni najc xcuent Sprit Dxan xten Dios

<sup>1</sup> Ni'cni ṅaj rut rajcdi rbe'c xcälquij renani ahuililajz xtidx Jesucrist, renani diru jiu gunreni latsiaj ni rlazj gun tiejxhreni, alga riurureni rujnreni ni rnibee Sprit Dxan xten Dios ni rbäjz neṅ lastooreni. <sup>2</sup> Sa'csi leii xten Sprit Dxan xten Dios ni rudeed yälṅabajṅ xcuent Jesucrist, abasḷaani narä lo yälṅnibee xten xleii dojl näjza yälgujt. <sup>3</sup> Sa'csi nani di niajcdi niujn leibiejw, sa'csi dini niajc nadip lo rebenguedxliuj te gacreni beṅnaya nez loj Dios, ni'c bejn Dios che baxhaḷni Xi'nni Jesucrist, si'c te beṅ guedxliujre xcuent dojl, te bejn ni yälgujxhtis lo dojl ni rnibee tiejxh bejn. <sup>4</sup> Te si'c gac xcälgujxhtis xten leibiejw

lo tiejxh nuurnu, renani dirunu gusoob nani rlajz gun tiejxhnu, sa'csi naj rbajnnu si'c ni rnibee Sprit Dxi xten Dios ni yu' neñ lastoonu.

<sup>5</sup> Sa'csi renani rusoobtis nani rlajz gun tiejxhrene, rujntisrene xhigab xcuent redojlga, luxh renani rusoob xtidx Sprit Dxi xten Dios rujntisrene xhigab xcuent nani rlajz Dios gunrene. <sup>6</sup> Sa'csi renani yu'tis yejcreni nani rlajz gun tiejxhrene, sejtrene, sinijtrene; luxh renani yu'tis yejcreni nani rnii Sprit Dxi Dios, reni'c sibecdxilajzrene, sica'reni yäl nabajñ lo Dios par tejpas. <sup>7</sup> Te xcäriejn nani riutis ni rlajz gun tiejxh bejn rdxe'ch Dios lojni sa'csi dini gusoob xleii Dios, luxh nicla gac gunnini. <sup>8</sup> Renani nabajntis te gunrene latsiaj ni rlajz gun tiejxhrene di Dios guibalaznäjrene.

<sup>9</sup> Luxh la'tu dirutu gun si'ctis ni rlajz gun tiejxhtu, ni'cni rujntu si'c ni rlajz Sprit Dxi xten Dios guntu, palga rbäjzni neñ lastootu. Palga yu' chu tejtu ni di Sprit Dxi cuääz neñ lastooni, di ni'c gac xpejnñi. <sup>10</sup> Palga rbäjz Jesucrist neñ lastootu, agujt tiejxhtu xcuent dojl, xpriutu nabajñ sa'csi anajctu beñnaya nez loj Dios. <sup>11</sup> Luxh palga neñ lastootu rbäjz Sprit xten nani baspañsac Jesucrist loj rebengut, lagajc nani baspañsac Jesucrist lo rebengut suspañsac tiexhnu ni nabajñ lo guedxliujre xcuent Xpiti nani yu' neñ lastoonu.

<sup>12</sup> Ni'cni rebetzä, najcnu bejn ni cuaj di'n, xhet lojdi tiexhnu te jienu si'c ni rlajz gun tiexhnu. <sup>13</sup> Sa'csi palga cayujntu si'c ni rlajztis gun tiejxhtu, sejtactu. Palga nabajntu xcuent Sprit Dxi xten Dios ni rbäjz neñ lastootu, sibälaztu latsiaj ni rlajz gun tiejxhtu, sibannäjtu Dios par tejpas.

<sup>14</sup> Sa'csi guiraa renani rului Sprit Dxi xten Dios guiraa reni'c najc rexi'n Dios. <sup>15</sup> Naj ditu nica' te sprit xten te mos te chusactu lo yälrdxejb, alga cua'tu sprit xten ni najc

si'c te bisiäj**β** ni cua' bejn si'c xi'npacni, naj najcnu xi'nni, ni'cni sajc gäbnu lojni: “Guejblu, Xtadä.” <sup>16</sup> Sa'csi lagajc Sprit Dxan xten Dios rului loj xpritnu, najcpacnu xi'n Dios. <sup>17</sup> Luxh palga najcnu rexi'nni, sica'zanu yälnasa'c lo Dios, tejsi yälnasa'c con Dad Jesucrist, palga guliini tednu lagajc trabajw ni gudejdni xcuent xtiidxni, te tejsiza siliä'p xpala'nnu con laani.

<sup>18</sup> Sa'csi narä runä xhigab retrabajw ni cadejdnu nen redxeje, digacdi gun tebloonureni con yälrdimbicha' nani churu guihuiinu. <sup>19</sup> Sa'csi guiraa recos nani benchee Dios lo guedxliujre, cabäjzreni, yuduxhreni gaan fiireni deje che guluiloj Dios chuni'c najc rexi'nni. <sup>20</sup> Guiraa recos ni gulecxtiej Dios lo guedxliujre, xlia'si gujreni, xhet sa'csi si'c rlajzdi recosga, per sa'csi si'c bejn Dios, ni cabäjztis <sup>21</sup> guslaapacni guiraa recos ni bencheeni lo guedxliujre lo xcälrrnibee yälgujt, yälrnitloj, te deje sajc jiu'ni lo yälrbedxi xten xcälrrdimbicha' xten rexi'n Dios. <sup>22</sup> Guiraa recos ni gulecxtiej Dios lo guedxliujre entis roonreni, guira deje rejdreni trabajw, si'c rejd te gunaa trabajw che rajl xi'nni. <sup>23</sup> Luxh xhet nani tre'tis lo guedxliujdi, näjza nuunu ni yu' Sprit Dxan xten Dios nen lastoonu, roonzanu cabääznu deje cheni xca' Dios nuure si'c rexi'nni, cheni guscoobzani tiexhnu. <sup>24</sup> Sa'csi xcälrlilaaznu ni rbääznu, ni'c bejn gulaanu luxh yälrbäjz ni guyasi rien, di ni'c gac yälrbäjz, sa'csi ¿chu laa ni cuääz xcuent te cos ni ala bahuini? <sup>25</sup> Palga cabääznu xcuent te cos ni gajdnu guihui, rbaali laaznu, rsiudzu'tznu rbäjznu guihuiinu gacni.

<sup>26</sup> Sigajcza racnäj Sprit Dxan xten Dios nuure cadro xheti yälrrutijp laaznu sa'csi nicla guidonnu xho mood riäjl guiniab bejn lo Dios. Luxh lagajc Sprit Dxan ni yu' lastoonu rniabni lo Dios xcuent nuure con yälrbedxnen nani nicla gajd bejn gäb con diidx xho najcni. <sup>27</sup> Dios,

nani rula'tz lastoonu, nanchee xhini'c rniab Sprit Dxi  
xtenni xcuent nuurnu, sa'csi rniabni si'cpac ni rlanj Dios  
guiniabnu xcuent rexpejn̄pac Dios.

*Siennu gaanpac loj guira'ti*

<sup>28</sup>Nadoncheenu guira'ti ni rsiajc rebejn̄ ni sanälajz Dios,  
reni agule Dios te gunreni xtzuunni rsiajcrenini te gun  
Dios gac recosga par xcäl̄nasa'creni. <sup>29</sup>Sa'csi renani biem-  
bee Dios galooli, reni'c gule Dios cheni gajdli guirixtiej  
guedxliujre, te gacreni si'c ni najc Xi'nni; te gacza Xi'nni  
ganid loj guiraa ni najc famil xten Dios. <sup>30</sup>Renani gu-  
leni galooli, reni'c gurejdxni; renani gurejdxni, bejnzani  
najcreni beñnaya nez loj Dios; renani bejn̄ni najcreni  
beñnaya nez loj Dios, gulä'pzani xpala'nreni.

<sup>31</sup>¿Xhixhni'c guiniinu xcuent dee? Palga yu' Dios  
xlaadnu, ¿chuxh ni'c najc ni gun gaan loonu? <sup>32</sup>Dios  
nani di nudxojn Xi'nni, nani cuäjb cuaj Xi'nni lo cruzj te  
gujtni, te gudijxni xcuent xtoj̄l̄nu, ¿xho dini guniidx loonu  
xcuent Xi'nni guira'ti nani rquiinnu, ä? <sup>33</sup>¿Chuni'c sajc  
cue'c xhi xcäl̄quij reni agule Dios nez lo Dios, ä? Ni lagajc  
Dios najc nani rnii najcnu beñnaya nez lojni. <sup>34</sup>¿Chuni'c  
najc nani cue'c xhi xcäl̄quijnu nez lo Dios? Jesucrist najc  
nani gujt por nuure, luxh et ni'ctis. Laani gubansaczani loj  
rebengujt, luxh naj sobga'ni xladbee Dios cadro rnibeeni;  
laazani cabejdx canabni lo Dios xcuentnu. <sup>35</sup>¿Chuni'c sajc  
gudzucaj nuurnu lo yäl̄sanälajz xten Jesucrist: trabajw,  
o yäl̄xliajs, o yäl̄rusacsí, o yäl̄rliaan, o yäl̄xhabääl, o  
yäl̄rdxejb, o te spaad, ä? Nicla tejni. <sup>36</sup>Si'c ni caj lo guijt̄z  
ni caj xtidx Dios:

Xcuentlu, sa'csi najcnu xpejn̄lu caye'tnu guixe-guixee.  
Ruchaagreni cuent najcnu si'c xiil ni aguro' te ju't bejn̄ni.  
<sup>37</sup>Luxh loj guiraa recosre, sujnpacnu gaan xcuent nani  
sanälajz nuure, sa'csi sacnäjpacni nuure. <sup>38</sup>Sa'csi

anancheä nicla yälgujt, niclza yäl<sub>n</sub>abaj<sub>n</sub>, nicla rexangl Dios, niclaza renani rnibee, nicla recos ni yu' <sub>n</sub>aj, niclaza recos nani churu gac, niclaza yäl<sub>m</sub>ilaagwr, <sup>39</sup> nicla jiaroduxh, niclaza jiäjt<sub>p</sub>ac, niclaza xhitis cos ni guc-chee, nicla tej redee di gacdi gudzucaj nuurnu lo xcäl<sub>s</sub>anälajz Dios, yäl<sub>s</sub>anälajz ni rajpza Dad, Jesucrist.

## 9

### *Dios agule reben* Israel

<sup>1</sup> Caniä didxguliipac lojtu sa'csi rililazä xtidx Jesucrist. Dina guiniä didx-xhii. Sprit D<sub>x</sub>an xten Dios caguluii xcärienä laaca rniä; <sup>2</sup> cayac-huinduxh lastoä, sanuutis yäl<sub>x</sub>liajsga. <sup>3</sup> Sa'csi narä r<sub>l</sub>azä malaii sajc lagajc narä nitloä lo Dios te sajc gacnäá resa'ä lo guedxliujre, rexpej<sub>n</sub> Israel. <sup>4</sup> Sa'csi laareni najc xagdoo toIsrael, luxh laareni nungäj<sub>l</sub> gacreni si'c xi'npac Dios. Gubannäj Diosreni. Bia'n Dios didx con laareni. Basa'n Dios xleii Moisés lojreni. Bazuxhijbreni nez lo Dios nen<sub>n</sub> guidoo. Sica'reni reyäl<sub>n</sub>asa'c xten Dios palga jiureni xtiidxni. <sup>5</sup> Laareni najc rexagdoo xten toxtadgoldoonu ni gubaj<sub>n</sub> agujc xhero. Jesucrist guj<sub>c</sub>za xagdoo xten toIsrael che goj<sub>l</sub>ni si'c te ben<sub>n</sub> guedxliuj. Laani najczani Dios loj guiraanu. Suchä'p xpala'nni par tejpas. Sugacni si'c.

<sup>6</sup> Luxh dini gac si'cni abanijt xtidx Dios nani bia'nni loj toIsrael. Sa'csi xhet guiraadi rebej<sub>n</sub> ni najc xagdoo toIsrael najc xpej<sub>n</sub>pac Israel. <sup>7</sup> Diza guiraa reni najc rexagdoo toAbram gac xi'nguliipacni sa'csi räjp Dios lo toAbram: “Rexagdodoolu nani guigab najc reni gac xagdoo Isaac.” <sup>8</sup> Ni'cni xhet guiraadi rexagdoo toAbram najc rexi'n Dios, xtebtis renani chalilajz xtiidxni, reni'c najc xi'nni. <sup>9</sup> Sa'csi bia'n Dios diidx loj toAbram: “Stebijz, lagajc bäiire guibisacä, te dxejc chu te xi'n Sara.”

<sup>10</sup> Xhet diidxtisga gunii Dios. Guniizani lo toRebeca, che nuxi'nni cua'ch, xi'n chäälni, toxtadgoolnu Isaac. <sup>11</sup> Ni'cni ansde gaal rexi'nni, ansde niujnreni te dzunsa'c o te dzunguijdx, te soobpac xtidx Dios xcuent chuni'c cueni lo guiro'p rebäzre, xhet sa'csi bejndireni dzunsa'c, per sa'csi agule Diosni, <sup>12</sup> ni'c räjp Dios lo toRebeca: “Xingangaloolu gac xmos xinhuinlu.” <sup>13</sup> Si'cza caj lo guiitz rediidxre: “Sanälazä Jacob, niluxh bidxechaää Esaú.”

<sup>14</sup> ¿Xhini'c guiniinu naj? ¿Xhet laadi rujn Dios, ä? ¿Xho gacni si'c! <sup>15</sup> Sa'csi räjp Dios loj toMoisés: “Sulaslazä chutis bejn nani rlazä gulaslazä, sacnäá chutis bejn nani rlazä gacnäá.” <sup>16</sup> Ni'cni dini gac xcuent ni rlanj rebejn gac, dizani gac xcuent nani rujn rebejn. Rajctisni si'c rlanj Dios nani rulaslajz bejn. <sup>17</sup> Ni'cni caj lo guiitz xten Dios che gunii Dios xcuent Faraón: “Narä benä gujclu reii xten Egipto te guluiloj xcälrnibeä, te guiliä'p bejn xpala'nä guideb guedxliujre.” <sup>18</sup> Rulaslajzni rebejn nani rlanjtisni, runnadipzani lastoo bejn nani rlanjtisni.

<sup>19</sup> Naj la'tu siniitu loä: “¿Xhicuent rucuaquijni bejn? ¿Chuni'c sajc sudzu'tz nez loj nani rlanjzni gac, ä?” <sup>20</sup> ¿Chuxh luj, bejn guedxliuj, te jieinäjlu Dios? Xhixh säjb te gues loj nani bencheeni: “¿Xhicuent bejnlu narä scree?” <sup>21</sup> Gurniälojlu. Bejn nani runchee guejs, ¿la di gacdi gunni si'ctisni rlanjzni con bajnga, ä? ¿La di gacdi guncheeni te gessa'c nägajcza te guesyuj ni xhet sirbdi con lagajc bajnga?

<sup>22</sup> ¿Xhiru najc, palga Dios rlanjzni guluilojni xho rujnni yälguxhtis, näjza rlanjzni guluilojni xcälrnibeeni, gopnäjni pasens renani nungäjł gac yälguxhtis, te nitlojzareni, ä? <sup>23</sup> Bejnni si'c te guluilojni lacti sajc xcälrdimbicha'ni loj renani galooli guleni chú lojni lo xcälrdimbicha'ni. <sup>24</sup> Lagajc nuurnu najcnu reni aguleni; xhet xtebtis loj

## Romanos 9:25      23      Romanos 9:33

rexpen Israel guleni nuurnu, nájza loj rebejn ni di gac  
rexpen Israel guleni nuurnu. <sup>25</sup> Cajza lo guijt兹 ni bacuaa  
Oseas:

Renani di gac xpenä, reni'c cuälää “xpenä”.

Luxh nani dina ninälazä, sinälazäni.

<sup>26</sup> Dxejcti lagajc cadro räjpreni lojreni:

“Ditu gac rexpenä”,

lagajc ro'c säjpreni lojreni:

“La'tu najctu xi'n Dios ni nabajn par tejpas.”

<sup>27</sup> Cajza lo guijt兹 ni bacuaa Isaías: “Mase najc xhidajl  
rexpen Israel si'c najc yujxh ni tre' ro' nisdoo, guxii gac  
reni laa lo dojl. <sup>28</sup> Sa'csi susoobpac Dad, Dios xtiidxni  
xcuent xcäl\_guxhtis reben guedxliuj, luxh siojbza gun-  
nini.” <sup>29</sup> Guniiza Isaías, xcuent nani churu gac, bacuaani:

Palga di Dios ni yu' xhaguibaa nusa'n gaii xagdoo reben  
tiemp,  
niajcnu si'c gujc Sodoma nájza Gomorra, reguejdx ni  
gunitloj.

*Xtidx Dios näj rexpen Israel*

<sup>30</sup> ¿Xhini'c sajc guiniinu naj? Rebejn nani di gac xpen  
Israel, direni niguiil xho gacreni ben\_naya nez loj Dios,  
niluxh agujcreni ben\_naya nez loj Dios sa'csi huililajzreni  
xtidx Jesucrist. <sup>31</sup> Luxh rexpen Israel, mase sanuutisreni  
lo xleii Moisés ni rului xho gac bejn ben\_naya nez loj  
Dios, banijtreni, direni niujn gaan nusoobreni guideb  
leiiga. <sup>32</sup> ¿Xhicuent gujcni si'c? Sa'csi direni nililajz xtidx  
Dios, alga rljazreni guntisreni dzuun xten leii, naareni si'c  
gacreni ben\_naya nez lo Dios. Ni'cni gulaj ni'reni lo guij ni  
rutienta' bejn, nalajznu direni nililajz xtidx Dios xcuent  
Jesucrist. <sup>33</sup> Si'cza bacuaa Isaías, räjpni:

Aguleä te bejn lo guedx Siön ni gac si'c te guij cadro rtiäj  
ni' bejn,

te guij ni rusäl'ta' bejn.

Chutis tej nani chalilajz xtiidxni, dini jianxtujy.

## 10

<sup>1</sup> Rebetzä, rlazduxhä chalilajz rexpenä xtidx Dios. Rni-abduxhä lo Dios te guslaanireni lo xtojireni. <sup>2</sup> Narä rniäpac nancheä ruzuxhijb rexpen Israel lo Dios, niluxh direni gumbesa'c xhini'c rlanj Dios gunreni. <sup>3</sup> Sa'csi direni niacbee xcuent xho rajc te bejn te bennaya nez loj Dios, ni'c rlanjzreni gunreni dzuun si'c ni caj lo leii te gacreni bennaya nez loj Dios, ni'cza direni nusoob xtidx Dios te gacreni bennaya nez lojni. <sup>4</sup> Abasoob Jesucrist xtidx Leii, ni'cni che chalilajz bejn xtidx Jesucrist, anajcreni bennaya nez loj Dios.

<sup>5</sup> ToMoisés bacuaa rediidxre: “Chutis ni rlanj gac bennaya nez loj Dios sa'csi rusoobni xtidx leii, nanab gusobsa'cpacni diidxga guideb nabajni lo guedxliujre.” <sup>6</sup> Xcäl\_nayareni nez loj Dios sa'csi rililajzreni xtidx Jesucrist, rni scree: “Na'c guiniitu nen lastootu, ¿chuni'c chä'p xhaguibaa?” nalajznu, te jiadnäsacni Jesucrist loj guedxliuj. <sup>7</sup> Na'cza gäbni: “¿Chuni'c jäjt gabijl?” (nalajznu te chaxiini Jesucrist loj rebengut). <sup>8</sup> ¿Xhini'c rniini naj? Rniini: “Diidxga suga' gajxh ro'tu, nen lastootu.” Nalajznu, diidx xcuent yärlililaaz nani cagusule'nu lojtu. <sup>9</sup> Rniinu lojtu, palga guiniitu con ro'tu, Jesucrist najc Dad loonu, palga chalilajztu baspañsac Dios Jesucrist loj rebengut, suslaani la'tu lo dojl. <sup>10</sup> Sa'csi con lastooni rililajz biniet xtiidxni, ni'c rajcni bennaya nez loj Dios; luxh che rcäjpza biniet con ro'ni, Jesucrist rnibee loonu, ruslaa Diosni lo dojl.

<sup>11</sup> Sa'csi rni xtidx Dios scree: “Chutis ni rililajz xtidx Dad Jesucrist, dini jianxtujy.” <sup>12</sup> Sa'csi guiraa rebejn najc tebloj nez lojni, rexpejn Israel sigajc rebenzajt, sa'csi lagajc laani najcni Dad lo guiraareni, rulaslazduxhni guiraa

renani rbedx-rniab lojni. <sup>13</sup> Lo xtidx Dios caj rediidxre: “Chutis ni rbedx-rniab lo Dad, siliaani lo xtojlni palga rililajzni xtidx Dios.” <sup>14</sup> ¿Xho gac guiniabreni lo Dad, palga direni chalilajz xtiidxni? ¿Xho gacza chalilajzreni xtiidxni, palga gajd diajgreni jiejn xtiidxni? ¿Luxh xho jiejn diajgreni xtiidxni palga rut rusule'di diidxga lojreni, ä? <sup>15</sup> Luxh ¿xhoza gusule'reni diidxga palga rut guxhałdirenireni? Si'cni caj lo guijtz: “Chipza saru najc ni' renani riädnä diidx xcuent cossa'c, yälrbecdxilajz rebejn.”

<sup>16</sup> Xhet guiraadireni rusoob xtiidxni, sa'csi guniiza toIsaías: “Dad, ¿chuni'c chalilajz xtiidxnu?” <sup>17</sup> Rililajz bejn xtidx Dios che rucudiajgreni diidxga; rucudiajgzarenireni che yu' chu rusule' xtidx Jesucrist.

<sup>18</sup> Naj arniä: Gajdpac diajgreni jiejn xtiidxni, o ¿la babiejn diajgreni, ä? Pues abiejn diajgreni, sa'csi lo xtidx Dios caj scree:

Abire'ch xse'reni guideb guedxliuj,  
abidzujnza rextiidxrenireni lo guiraa reguejdx ni tre' lo guedxliujre.

<sup>19</sup> Rniäza: Dipac rexpen Israel niacbee, o ¿la gucbeereni, ä? Galooli gunii toMoisés rediidxre:  
Sunä gudxojuentu xcuent rebejn ni di gac te guejdx,  
con te guejdx nani di gacbee suche'chä la'tu.

<sup>20</sup> Diza toIsaías nidxejb guniini rediidxre:  
Renani di niguiil narä, bidxäjl narä,  
baluiloäza loj renani di niniabdiidx narä.

<sup>21</sup> Guniiza toIsaías xcuent rexpen Israel:  
Desde galooli, dxej-yääl basgää nää lo rebejnnga te niurenireni  
xtidxä,  
luxh najcreni bejn ni di gusoob diidx, rutzu'reni didxnaj.

## 11

*Rexpen Israel nani gulaa lo dojl*

<sup>1</sup> Arniä: ¿La agulälaz Dios rexpen Israel, ä? ¿Xho gacni si'c! Ni lagajc narä nacä te xpen Israel, te xag-doo toAbram, nadxagä lo resa' toBenjamín. <sup>2</sup> Di Dios nibälaz rexpejni, xpen Israel nani guleni galooli che gajdli guirixtiej guedxliuj. O ¿la dilu gacbee xhi caj lo xtidx Dios cadre rni xcuent Elías, xho gunabduxh Elías didxnaj lo Dios xcuent rexpen Israel, ä? Räjpn scree: <sup>3</sup> “Dad, abagu'treni guiraa reniguii nani gunii xtiidxlu, abatzujreni rexquidoolu, xtebtis narä bia'nä, luxh naj rlanjreni ju'treni narä.” <sup>4</sup> Luxh, ¿xhini'c räjp Dios lojni? Räjpn: “Abalucheä gajdz mił bejn nani gajd guzuxhijb nez loj Baal.” <sup>5</sup> Si'cza naj, abia'n te chinae' rexpen Israel nani agule Dios xcuent xcäl\_rulaslajzni. <sup>6</sup> Dxejc palga ruslaani nuure lo dojl xcuent xcäl\_rulaslajzni diruni gac sa'csi yu' xhi dzuun biennu te nuslaani nuure lo dojl. Paru si'c najcni diru xcäl\_rulaslajz Dios gac yäl\_rulaslajz.

<sup>7</sup> ¿Dxejca'? Di rexpen Israel nidxäl nani caguilreni, luxh rebejn nani agule Dios, ni'c bidxälni, luxh ste cuaareni, aguyalajzreni. <sup>8</sup> Gujcni si'c caj lo xtidx Dios: Bascäy Dios xcäriejnreni, najza balojni di jien, lo dxe najli di diajgreni jiejn.

<sup>9</sup> Guniiza toDavid, scree caj lo xtidx Dios:

Sugun xmex lanijreni jiajbreni,  
te gac guiga'reni,

sugacni si'c guij ni rulani' bejn, te gacreni yäl\_guxhtis.

<sup>10</sup> Suguscäy Dios balojreni te na'c fisa'creni,  
sujie't dejtzreni, sutedreni trabajwduxh par tejpas.

*Yäl\_ruslaa* lo dojl xten bejn ni di gac xpen Israel

<sup>11</sup> Naj rniabdixä: ¿La biajb rexpen Israel te gunijtreni par tejpas, ä? ¿Xho gacni si'c! Sa'csi biajb rexpejn Israel, ni'cni gojl biääd yäl\_ruslaa lo dojl lo bejn ni di gac xpen Israel, te si'c guisiäblajz lajz rexpen Israel laareni

lo dojl. <sup>12</sup> Palga xcuent dojl ni bejn xpen Israel gojp reben guedxliuj xcäl'nasa'c Dios, palga xcuent yälrunijt xten rexpen Israel guyu' xcäl'nasa'c Dios par rebejn ni di gac xpen Israel, aticaxh chu xcäl'nasa'creni che gusoob xpen Israel xtidx Dios.

<sup>13</sup> Naj caniä lojtu ni najc bejn ni di gac xpejn Israel. Gule Dios narä te gusule'ä xtiidxni lojtu, ni'cni caläpä xpala'n xtzunä, <sup>14</sup> te don xho gunä te guisiäblajz reben ladxä ni najc xpen Israel, te si'c chalilajzreni xtidx Jesucrist. <sup>15</sup> Palga gulecdxireni lajz reben guedxliuj con Dios sa'csi gulälaz rexpen Israel xtidx Jesucrist, aticaxh che chalilajz rexpen Israel rextidx Jesucrist, sibansac renani najc si'c bengut. <sup>16</sup> Palga tla' cojb najc hueen, guideb cojbga najc hueen. Sigajcza najc te yajg; palga xlobaani najc hueen, guidebni najc hueen.

<sup>17</sup> Rexpen Israel najcreni si'c te yajg oliib; palga gutiuugreni te naa yajgga, dxejc ro'c guquiidreni naa ste'ca yajg te guibajjni con xtiejn yajg oliibga. <sup>18</sup> Ni'cni, na'c gactu guyalajz lo reñaapac yajgga. Colgusnaj lajztu, xhet la'ditu ni rudeed yäl'nabajn lo xlobaa yajgga, lobaaga ni runiidx yäl'nabajn lojtu.

<sup>19</sup> Dxejc colguinii: “Batiuugreni naapac yajgre, te gujc biguidä cuä' yajgga.” <sup>20</sup> Guliipacni, biru' naapac yajgga sa'csi direni nililajz xtidx Dios luxh la'tu biguiidtu cuä' yajgga sa'csi huililajztu xtiidxni. Na'c gactu guyalajz, colguidxejb, <sup>21</sup> sa'csi palga di Dios nutedbia renaa yajgga, diza Dios gutedbia la'tu. <sup>22</sup> Bahuii j lacti hueen najc Dios! Luxh lacti niälajzzani; con renani banijt najcni niälajz, luxh lacti rulasajz Dios la'tu palga chanuu jiutu xtiidxni. Palga ditu jiu xtiidxni, näjza la'tu sudzucaj Dios. <sup>23</sup> Luxh sigajcza reni bidin, palga di chanuu cuälazreni xtiidxni sajz suquidsac Diosreni lo yajgga. <sup>24</sup> Luxh la'tu najctu benzijt, najctu si'c naa te yagoliib ni xtebca gulejn nen

dajn. Luxh batiuugni la'tu te baquidni la'tu lo te yagoliib ni najc yagsa'c ni rcaduxh oliib lojni, mase xhet si'cti najc olibguijxhga, jaticaxh rexpen Israel ni banijt najc si'c naapac xten yagolibsa'cga ni bidin, palga chalilajzpacreni xtidx Dios, suquidsac Diosreni loj yajg ni najc xtenpacreni!

*Che* laapac rexpen Israel lo dojl

<sup>25</sup> Rebetzä, rlazä gacbeetu xcuent te diidx nagajn, te di naatu nanduxhtu. Dee najc didx nagajnga: yu' rexpejn Israel ni guc najd lastooreni te direni nililajz xtidx Dios, hasta guisa' redxey ni chalilajz rebenzijt xtidx Dios. <sup>26</sup> Dxejcti siliaapac guiraa rexpen Israel lo dojl che chalilajzreni xtidx Dios, sa'csi si'c caj lo xtidx Dios, cadre caj rediidxre:

Nani ruslaa sajc ben guedx Siön,  
luxh sudzucajni xtoj renani najc xagdoob toJacoob.

<sup>27</sup> Dee najc diidx ni bia'nä con laareni,  
che gudzucaä xtojreni.

<sup>28</sup> Naj, najczeni xcontraar Dios sa'csi rdxe'chreni xcuent xtidx Jesucrist, te chalilajztu; niluxh Dios sanälajzreni sa'csi si'c abia'nä diidx con retoxtadgoldooreni. <sup>29</sup> Sa'csi rut rajcni rudzucaj nicla yäl'nasa'c ni rudeed Dios, niclaza yäl'rbejdx xten Dios. <sup>30</sup> La'tu galoo ditu nusoob xtidx Dios. Naj rulasajz Dios la'tu sa'csi gulälaz rexpen Israel xtiidxni. <sup>31</sup> Sigajcza naj direni gusoob xtidx Dios, niluxh si'c najcni te gulasajz Diosreni sa'csi balasajzzani la'tu. <sup>32</sup> Dios basaan bjaib guiraanu lo dojl, te si'c sajc gulasajz Dios guiraanu.

<sup>33</sup> ¡Lacti guroob najc yäl'nasa'c xten xcäl'najn, xcäl'racbee xten Dios! Nicla tej bejn guedxliuj di gacbee guiraa rexcäl'guxhtisni, rudliidiza najn rexnezyujni. <sup>34</sup> Si'c caj lo guijt: “¿Chuni'c gucbee xcäriejn Dios? ¿Chuni'cza abaluini? Rutliidi. <sup>35</sup> O ¿chuni'c badedxgaa te xhi cos

lojni, te quixsacnini lojni, ä? Rutliidi.” <sup>36</sup> Sa'csi loj Dios siääd guira'ti, luxh laani bencheeni guira'ti par lagajcza laani. Suguiliä'pnu xpala'nni par tejpas. Sugacni si'c.

## 12

*Yälnabajn* rliä'p xpala'n Dios

<sup>1</sup> Ni'cni rulidxä la'tu rebetzä, sa'csi rulaslajz Dios nuure, colgudeed xcäl**n**abajntu lo Dios te gac guiba**n**sa'ctu si'cni rlajz Dios. Dee najc yäl**r**aj**n**pac Dios si'c ni nungä**j**l ga**n**tu Dios. <sup>2</sup> Na'c rujntu lagajc xhigab ni ru**j**n rebe**n** guedxliuj, colguscoob re**x**higabtu te guidxaapac x**m**oodtu te si'c guluii Dios xhini'c rlajz**n**i guntu, nalajznu xhini'c najc hueen, xhini'c rdxag**l**ajz Dios, xhini'cza najc laapac.

<sup>3</sup> Sa'csi balaslajz Dios narä, ni'c rusule'ä xtiid**x**ni loj te**j**gatu, rniä lo**j**tu, na'c guiliä'ptu lagajc xpala'ntu, naatu sajcrutu loj sa'tu. Col**y**ej**n** xhigabsa'c, te laaca gac xhigabtu, si'cni baniid**x** Dios lo te**j**gatu xho chalilajz**t**u xtiid**x**ni.

<sup>4</sup> Sa'csi sigajc najc tie**j**xhnu, yu' xhid**l** la'ni, luxh te**j**gareni ru**j**n x**t**zuun-x**t**zuunreni, <sup>5</sup> sigajcza nuure nani rililajz x**t**id**x** Jesucrist, najcnu xhidaj**l**, najcnu si'c te**j**si tie**j**xh lo Jesucrist, mase te**j**ganu ru**j**n x**t**zun-x**t**zuunnu, te**j**si najcnu.

<sup>6</sup> Luxh sa'csi te**j**ganu rajpnu garen-garen dzuun xcuent yäl**r**ulaslajz ni baniid**x** Dios loonu, su**j**iennu re**x**tzuunnu screeza: nani rajc rni**i** x**t**id**x** Jesucrist, suguniinini, si'c ni najc xcäl**r**ililajz**n**i; <sup>7</sup> nani rajc rac**n**äj sa'ni, sugac**n**äj**n**i; nani rajc ruluii x**t**id**x** Dios, sugului**i**ni; <sup>8</sup> nani rajc gulij**d**x resa'ni, sugulij**d**xnireni, nani rajc ruded**x**lia' xhix**t**enni lo sa'ni, saru sugudeed**n**i xhix**t**enni; nani rajc rnibee lo sa'ni, suguni**bee**ni con yäl**n**adolajz; nani rajc rulaslajz resa'ni, sugulaslajz**n**i con yäl**r**balajz.

*Xho nanab guiba***n**nu lo xnezyuj Dios

<sup>9</sup> Colchanälajzpac resa'tu, na'c gunsitu si'cni rinälajztureni. Colcuälaz redzunguijdx, colyejntis redzunsac. <sup>10</sup> Colchanälajz resa'tu si'c rinälajz bejn rebejtzni. Colguiliä'p xpala'nreni.

<sup>11</sup> Colyejn dzunsa'c, na'c cuedxitu. Colyejn xtzuum Jesucrist con guideb xtijptu, guideb xcäriejntu.

<sup>12</sup> Colguibalajz sa'csi ahuililajztu xtiidxni. Colcuedcxi lajztu che tedtu trabajw. Colcuedx-colnabtis lo Dios guideb nabajntu.

<sup>13</sup> Colgacnäj rebejn nani rililajz xtidx Dios; sacru colnii loj ni riädhuiitu.

<sup>14</sup> Colguinii didxsa'c xcuent renani rusacsí la'tu, na'c gudzubdetureni.

<sup>15</sup> Colguibalaznäj renani rbalajz, colyonnäj renani roon.

<sup>16</sup> Colyejn tejtis xhigab con resa'tu, na'c gactu gualajz, colguchaag loj reben nadolajz. Na'c guchalotu najctu bennanduxh.

<sup>17</sup> Na'c gudzu'tu dzunguijdx loj renani rujn dzunguijdx lojtu. Colyejn recossa'c nez loj guirasi bejn. <sup>18</sup> Cadrotis sajcni, dxitis colguibannäj guiraa rebejn. <sup>19</sup> Rebetzä, na'c guntu xhigab lagajc la'tu gudeedu xten renani rujn dojl lojtu, sa'csi lagajc Dios gun yälguxhtis lojreni, ni'cni caj lo xquijtzni scree: “Narä gunä yälguxhtis, narä quixä lojreni si'c naj Dad, Dios.” <sup>20</sup> Näjza: “Palga calaan nani rdxe'ch lojtu, colgudeed xhi gauni, palga cayojlni, colgudeedza xhi yäni, te si'c jianxtiujni.” <sup>21</sup> Na'c gusaantu gun redzunguijdx gaan lojtu, colyejn gaan lo dzunguijdx con recossa'c ni rujntu.

## 13

<sup>1</sup> Guiraatu nanab jiutu xtidx renani rnibee lojtu. Sa'csi xheti te yälrnibee nani di Dios nudeed, luxh guiraa reyälrnibee ni yu' lo guedxliujre, lagajc Dios gule'creni.

<sup>2</sup> Ni'cni renani di gusoob xtidx renani rnibee, xtidx Dios cabälazni. Luxh renani rujn si'c, lagajc laareni xcaquijreni dojl, sujn Dios yälguxhtis lojreni. <sup>3</sup> Renani rnibee di guchejb renani riu xtiidxreni, ruchejbreni renani najc beñ guijdx ni di jiu xtiidxreni. Palga di rlajztu guidxejbtu reguxhtis, bejntis dzunsa'c, dxejcti guiliä'preni xpala'ntu sa'csi rujntu dzunsa'c. <sup>4</sup> Reguxhtis rujnreni lojtu xtzuun Dios te guibaŋsa'ctu. Palga guntu dzunguijdx, colguidxejb, xhet xlia'di ca'ni spaad, sa'csi najcreni nani rujn xtzuun Dios te gunreni yälguxhtis, te quixpac renani rujn dojl. <sup>5</sup> Ni'cni nanab jiutu rextiidxreni, xhet ganaxtis sa'csi rujnreni yälguxhtis lojtu, näjza te ga'ptu te xcäriejnsa'c, te xcäriennaya. <sup>6</sup> Ni'cni colquijx lojreni nani riäjł xca'reni sa'csi renani rnibee najc xmos Dios, luxh ni'cpac najc xtzuunreni.

<sup>7</sup> Colgudeed lo guiraa bejñ nani riäjł xca'reni. Colquiix loj renani nazääbtu; colquijx impuest loj ni riäjł xca'ni; colchanälajz renani riäjł chanälajztu; colguiliä'p xpala'n renani riäjł chä'p xpala'reni. <sup>8</sup> Na'c xcajlu di'n loj nicla tej bejñ, di'ntis xten yälrinälajz sa'ni, sa'csi nani rinälajz xpisinñi, bejñga abasoob xleii Dios. <sup>9</sup> Sa'csi lo xleii Dios caj scree: “Na'c guesnäjlu bejñ ni di gac chäällu, na'c ju'tlu, na'c cuanlu, na'c gusgueelu, na'c chuguij lajzlu xhixten resa'lu.” Luxh palga yu' xhi stee leii rsa'ni con leii ni rnii: “Chanälajzlu resa'lu si'c sanälajzlu lagajc luj.” <sup>10</sup> Nani rajp yälsanälajz, dini gun latsiaj lo resa'ni. Ni'cni yälsanälajz rusooob releii ni caj lo xtidx Dios.

<sup>11</sup> Colyejn guiraa redee, sa'csi anajntu xho najc redxey ni nabajñnu naj, anajntu alagojl or guibajñnu lo bacal sa'csi abidzungajxhru dxej che laanu neñ dojl lo dxej che huililajznu. <sup>12</sup> Aguxhiñduxh, asiädgajxh bianij. Ni'cni cuääz jiennu redzuun guijdx ni rajc lo xcäjy, te jientisnu redzunsa'c ni rajc rdxee, lo bianij. <sup>13</sup> Guibansa'cnu si'c

riäjł guibajñ rebejñ rdxee, na'c guibañnu lo yälrä', niclaza lo yälbiejy, na'c guidiesnäjnü bejñ ni di gac chäälnu, na'c ga'pnu rebis, na'c guidxagdılñu resa'nu, na'c chuguij lajznu xhixten resa'nu. <sup>14</sup> Ni'cni colca' xcälñibee Jesucrist te na'c guntu redojl ni rlajz gun tiejxhtu.

## 14

### *Na'c guiniyajtu rebejtztu*

<sup>1</sup> Colñii didxdoo lo rebejñ nani di gumbesa'c xtidx Dios, na'c tilnäjtürenei. <sup>2</sup> Sa'csi yu' reni rililajz nani sajç gaureni guira'ti xhi cos, niluxh nani gajd sutijp lo yälřililajz, ganaxtis berduur rajwni. <sup>3</sup> Nani rajw guira'ti, na'c guidxechnäjñi nani di gau guira'ti; luxh nani di gau guira'ti, na'cza guiniyajñi nani rajw sa'csi Dios aguleza bejñga. <sup>4</sup> ¿Chuxh luj te guiniyajlu lo xmos te bejñ, ä? Sugäb lagajç xlamñi lojni la laaca rujñni o la xhet laadi rujñni. Luxh sujñni laaca sa'csi Dad Jesucrist sujñ sutijp lastooni.

<sup>5</sup> Tej bejñ naa sajçru tej dxej lo stee dxej, dxejç ste'ca bejñ rchalo guiraa redxej najç tebloj. Xhet najçdi, tejga bejñ sugunpac lagajç xhigabni. <sup>6</sup> Nani rapda te dxej, rujñnini te guiliä'pni xpala'n Dios, luxh nani di gunni, rliä'pžani xpala'n Dios sa'csi dini gapda te dxej. Luxh nani rajw guira'ti, rajwni te rliä'pni xpala'n Dios, sa'csi rudeedžani xquixtios lo Dios; nani di gau guira'ti, nez lo Dios dini gau, rliä'pžani xpala'n Dios, rudeedžani xquixtios lo Dios.

<sup>7</sup> Sa'csi nicla tejnu dinu guibajñ xcuentcanu, nicla tejzanu dinu guet xcuentcanu. <sup>8</sup> Palga nabaannu, nabaannu xcuent Dad Jesucrist; palga guetnu, rejtzanu xcuent Dad, Jesucrist. Ni'cni palga nabaannu, o palga guetnu, lałtis najçnu rexpeñ Dad, Jesucrist. <sup>9</sup> Ni'cni gujt

Jesucrist, ni'cni gubansaczani, te sajc gacni Dad xten rebengut, näjza Dad xten rebejn nani nabajn.

<sup>10</sup> Dxejc luj, ¿xhicuent cubeelu bejtzlu, ä? O ¿xhicuent rdxe'chlu rhuiilu lojni, ä? Ni guiragajcnu tednu nez loj Jesucrist cadro cueni te gunni yälguxhtis loonu. <sup>11</sup> Sa'csi scree caj lo xtidx Dios:

Si'ctis ni nabanä, rniliápac lojtu, räjp Dad Dios,  
guiraa reben guedxliuj suzuxhijbreni loä,  
luxh guiragajc ro'reni sicäjp narä nacä Dad Dios.

<sup>12</sup> Ni'cni guiraanu, tejganu sudeednu cuent loj Dios xcuent nani biennu.

### *Na'c guzállu bejtzlu*

<sup>13</sup> Ni'cni na'cru cubeenu sa'nu. Maazru hueen jiennu xhigab nen lastoonu xhetliidi jiennu ni gun jiajb resa'nu lo dojl. <sup>14</sup> Narä nanä, racbeäpac guira'ti najc hueen. Jesucrist Xtadnu baluü narä si'c. Luxh palga yu' chu tej ni rchalo dini gac hueen, par laatisni dini gac hueen. <sup>15</sup> Palga la'tu guntu gac-huin lajz te sa'tu sa'csi yu' xhi rajwtu, dirutu chasanäj xnezyuj yälšanälajz. Na'c gunlu gunijt te sa'lu xcuent nani rajwlu, sa'csi agujt Jesucrist xcuentni. <sup>16</sup> Ni'cni na'c gusaanlu guiniyajreni nani najc te cos hueen par luj. <sup>17</sup> Sa'csi xcälrnibee Dios dini gac xcuent yälrajw, niclaza xcuent yälrä'; xcälrnibee Dios najc xcuent te yäl nabannya nez loj Dios, näjza yälrbedxilajz con yälrbalajz xcuent Sprit Dxan xten Dios. <sup>18</sup> Sa'csi nani rujn si'c lo xtzuun Jesucrist, bejnga rchagljaz Dios, luxh reben guedxliuj rniiza didxsa'c xcuent sa' bejnga.

<sup>19</sup> Ni'cni chanuutis guidiilnu recos nani rujn chu yälrbedxilajz, näjza nani rujn racnäjnu resa'nu te tioobrureni loj xnezyuj Dios. <sup>20</sup> Na'c guntu nit xtzuun Dios xcuent ni rajwtu. Guliicani guira'ti ni rajw bejn najc naya, niluxh palga gautu te cos nani gun jiajb bejtzlu

nen dojl, ni'c najc xhet laadi. <sup>21</sup> Hueen najc na'c gautu bääł, na'cza yätu bin, na'cza guntu jiajb sa'lu nen dojl. <sup>22</sup> Nani rililajztu, ni'c colyajp xcuentcatu nez loj Dios. Chicbaa nani di cubee lagajc laani xcuent recos nani rniini laaca najcni. <sup>23</sup> Luxh palga guntio'p lajz te bejn xcuent nani rajwni, sigubeeni lagajc laani, sa'csi dini gau xcuent yärlililajz, sa'csi xhitis ni di gac xcuent yärlililajz, lagajc ni'c najc dojl.

## 15

### *Huinälajz sa'lu*

<sup>1</sup> Nuurnu ni agusutijpnu lo yärlililajz nanab gacnäjnu resa'nu nani gajd chalilazsa'c. Di gacdi guiban̄tisnu xcuentcanu. <sup>2</sup> Tejganu nanab chonälaaznu resa'nu lo xcäl̄nabansa'cni te gacnäjnu chalilajzruren̄i. <sup>3</sup> Sa'csi nicla Jesucrist dini nibaj̄n xcuentcane, luxh si'cni caj loj xtid̄x Dios: “Redid̄xyaj ni guniyajreni lojlu biajbreni yecä.” <sup>4</sup> Guiraa rediid̄x ni cuaj lo guijtz galooli, cuajreni te guluiireni nuurnu te ga'pnu yälsutijp näjza yälrustioblajz te gacza guibääznu lo xtid̄x Dios. <sup>5</sup> Dios rusutijp lajznu, Dios rutioob lastoonu. Rniabä loj Diosga gacnäj̄ni guntu tejtis xhigab xten Jesucrist con resa'tu. <sup>6</sup> Te dxejcti tejtis gac xse'tu guiliä'ptu xpala'n Dios, Xtad Jesucrist.

### *Gusule' xtid̄x Dios loj reben̄zijt*

<sup>7</sup> Ni'cni col̄ca' resa'tu, renani ahuililajz xtid̄x Dios sigajc cua' Jesucrist nuure te guiliä'pnu xpala'n Dios. <sup>8</sup> Sa'csi narä rniä lojtu, biääd Jesucrist te guj̄cni si'c te mos loj rexpen̄ Israel te baluiini xcuent did̄xgulii xten Dios te gusojb rediid̄x nani bia'n Dios loj retoxtadgoldoonu, <sup>9</sup> näjza par reben̄zijt, te guliä'preni xpala'n Dios sa'csi baluiloj̄ni xcäl̄rulaslajz Dios lojreni, si'c ni caj lo xtid̄x Dios:  
Ni'cni siliä'pä xpala'nlu nez loj reben̄zijt,

soläza dij lojlu.

<sup>10</sup> Dxejcti stee lajt rniini:

La'tu beñzijt, colguibalaznäj rexpenä rexpejn Israel.

<sup>11</sup> Stee lajt cajza:

Guiraatu, rebenzijt, colguiliä'p xpala'n Dad,  
suguiä'pza guiralii rebejn xpala'nni.

<sup>12</sup> Stee huält guniiza Isaías scree:

Siricaj te xagdoo tolsái,  
näjza te ni chäs te guinibeeni loj rebenzijt,  
laani cabäjz rebenzijt.

<sup>13</sup> Naj rniabä lo Dios ni rudeed yälrözajz, te laani gacnäj guibalajztu, cuecdxilajztu, sa'csi salilajztu, te tioobru yälrözajz ni rajptu sa'csi Sprit Dxi xten Dios yu' neñ lastootu, luxh laani rajpni yälrnibee.

<sup>14</sup> Luxh xcuent la'tu rebetzä, anancheä nabansa'ctu nasinduxhtu, arajcza rulijdxtu sa'tu, <sup>15</sup> luxh loj guijzre bacuaä gaii didxnaj xcuent tiop-chon cos, te gusnaä lajztu. Runä si'c xcuent yälrulasajz ni baniidx Dios loä <sup>16</sup> te gacä xpen Jesucrist ni rusule' diidx loj rebenzijt. Ni'cni cagusulesa'cä xtidx Dios lojreni, te xca' Dios rebenzijt si'c te gojn ni rudedä, sa'csi agujcreni bennaya sa'csi rbäjz Sprit Dxi neñ lastooreni.

<sup>17</sup> Ni'cni xcuent Jesucrist abidxälä xhicuent guiniduxhä didxro xcuent recos ni najc xten Dios. <sup>18</sup> Sa'csi dina guiniä diidx xcuent xhi stee cos, ganaxtis xcuent xho gucnäj Jesucrist narä, luxh xcuent ni'c basoob rebenzijt diidx, huililajzreni xtiidxni sa'csi biejn diajgreni xtiidxni, bahuiizareni rextzuunni, <sup>19</sup> con yälmilaagwr xten redzunro, resenro, ni gujc con xcälrnibee Sprit Dxi xten Dios. Ni'cni lo guedx Jerusalénli, näjza guideb gabi ro'c, lo guedx Ilírico, guiraa nejzga abasule'ä xtidx Jesucrist. <sup>20</sup> Si'cza guyu'ä ganduxh gusule'ä xtidx Dios xhet cadro ahuisule'direni xtidx Jesucrist, alga ganax cadro gajdreni

gumbee Jesucrist, te na'c gunä dzuun cadro gusloj cayujn ste'ca bejn dzuun. <sup>21</sup> Te gacni si'cni caj lo guijtz:  
 Renani rutliidi bij diidx xcuentni, suhuiipacreni lojni,  
 luxh renani gajdpac diajgreni jiejn xtiidxni,  
 sacbecheereni xtiidxni.

*Rujn Pabl xhigab chääni guedx Roma*

<sup>22</sup> Ni'cni balti huält badxojn Dios narä jiadhuiä lojtu.  
<sup>23</sup> Luxh naj sa'csi abaluxä xtzunä guideb nezree, najza sa'csi agujc balti ijz rlazduxhä jiadhuiä lojtu, <sup>24</sup> naj che cha'a España siädhuiäpac lojtu. Che tedä, jiadhuiäpac contu te ganid guibalaznäá la'tu, dxejcti gacnäjtu narä te cha'a España. <sup>25</sup> Naj sia'a guedx Jerusalén te chanää xcoobr rexpejn Dios ni yu' ree loj rebejn ro'c. <sup>26</sup> Sa'csi rebejn Macedonia najza reben Acaya rlazpacrene guxhalreni te coobr loj rebenproob ni yu' lo reni huililajz xtidx Dios nen guedx Jerusalén. <sup>27</sup> Bejnreni xhigab hueen gunreni si'c, luxh guli'careni, sa'csi yu' xhi nazääbreni lojreni sa'csi rebejn Jerusalén najc reni baxhal xtidx Jesucrist lojreni, naj laaca rujnreni cayacnäjreni reben Jerusalén con xhixtenreni. <sup>28</sup> Ni'cni che chasa'nä meel lojreni dxejc tedä lajdxtu, jiadhuiä contu, dxejc cha'ä España. <sup>29</sup> Luxh ananä che jialä lojtu, li guidxa lastoä xcäl'nasa'c xtidx Jesucrist guidzunä lojtu.

<sup>30</sup> Rebetzä, rniabduxhä lojtu xcuent xtidx Dad Jesucrist najza xcuent xcäl'rinälajz Sprit Dxan xten Dios, colguidx-agsa'tu, te colgacnäj colcuedx-guiniabtu lo Dios xcuentä.  
<sup>31</sup> Colnab lo Dios te gusläani narä loj reben Judea nani di gusoob xtiidxni te saru gun rebendxan ni yu' Jerusalén te xca'reni ni chanää lojreni. <sup>32</sup> Te cabaa lazä guidzunä lojtu, sa'csi rlazpacc Dios jialä lojtu, te lajni yu'ä lojtu siälyuä, susilazäza con la'tu. <sup>33</sup> Dios ni rbecdxilajz bejn gacnäj guiraatu. Sugacni si'c.

## 16

*Ruxha*lni xtixtios lojreni

<sup>1</sup> Colgacnäj bisiajnnu Febe. Nane're bejn dzunduxh nen guidoo ni tre' Cencrea. <sup>2</sup> Colca'ni xcuent Dad, Jesucrist, si'cni riäjł gun bejn gacnäj renani rililajzpac xtidx Dios. Colyacnäjni lo xhitis nani guiquiinni, sa'csi laani gucnäduxhni xhidal rebejn, nägajcza narä gucnäjni.

<sup>3</sup> Ruxhalä xtixtios lo Priscila näjza lo Aquila, ni racnäj narä lo xtzuun Jesucrist. <sup>4</sup> Laareni nicäjpreni niejtreni xcuentä, ni'c rudedä xquixtios lojreni, luxh xhet narätis, näjza guiraa rebejn ni yu' lo rexquidoo rebenzijt. <sup>5</sup> Ruxhalä xtixtios loj resa'ä ni rdxagsa'reni roliz Priscila näjza Aquila. Ruxhalä xtixtios loj Epeneto, ni sanälazduxhä, ni gujc benganid ni huililajz xtidx Jesucrist nen guedx Acaya. <sup>6</sup> Ruxhalä xtixtios lo Marii nani benduxh dzuun lojtu. <sup>7</sup> Ruxhalä xtixtios loj reben ladxä ni laa Andrónico näjza Junias; laareni guyunäj narä nen latzguiib, najcreni benro loj reapost. Ganid laareni huililajz xtidx Jesucrist, dxejcti huililazä.

<sup>8</sup> Ruxhalä xtixtios loj Amplias, ni sanälazä xcuent Jesucrist. <sup>9</sup> Ruxhalä xtixtios loj Urbano, ni runnäj nuurnu xtzuun Jesucrist. Ruxhaläza xtixtios loj Estaquis, ni sanälazä. <sup>10</sup> Ruxhaläza xtixtios loj Apeles, ni abadeed balti seen rililajzpacni xtidx Jesucrist. Ruxhaläza xtixtios loj guiraa ni tre' roliz Aristóbulo. <sup>11</sup> Ruxhaläza xtixtios lo Herodión ben ladxä, näjza loj resa' Narciso nani ahuililajz xtidx Jesucrist. <sup>12</sup> Ruxhaläza xtixtios loj nan Trifena näjza nan Trifosa, guiro'preni cayujn xtzuun Jesucrist. Ruxhaläza xtixtios loj nan Pérsida, sanälazäni, abenduxhni xtzun Jesucrist. <sup>13</sup> Ruxhaläza xtixtios lo Rufo nani agule Dios, näjza lo xnanni, sa'csi gujcn si'c xnanäza. <sup>14</sup> Ruxhaläza xtixtios loj Asíncrito, näjza lo Flegonte, näjza lo Hermas, näjza lo Patrobas, näjza lo Hermes, näjza lo

rebetzä ni yunäjreni. <sup>15</sup> Ruxhaläza xtixtios loj Filólogo, nájza lo Julia, nájza lo Nereo con bisiajnni, nájza lo Olimpas nájza guiraa rexpen Dios nani yunäjreni ro'c.

<sup>16</sup> Colye'tz xchan loj resa'tu. Guiraa rexquidoo Jesucrist ruxhal xtixtios lojtu.

<sup>17</sup> Rebetzä, rniabduxhä lojtu ga'ptu cuidaad xcuent renani rujn biey te guilia' sa' bejn, nani rlajz guntu guiraloj nani najc garenca loj yälrului ni bisieedtu, colguibicaj lojreni, <sup>18</sup> sa'csi sa' rebejn ga direni gun xtzuum Jesucrist. Laareni rlajztisreni gunreni si'c rlajz tiejxhrene; rniireni didxdoo, diidx ni rgudxguel diajg bejn te rusgueereni lastoo rebejn nani di susin. <sup>19</sup> Guiranejz abire'ch diidx xcuent xho rusobsapactu xtidx Jesucrist, ni'cni rbaa lazä, ni'cni rlazä gactu nasiñduxh xcuent recoshueen, luxh si'c báz xhet ganditu xcuent recosguijdx. <sup>20</sup> Luxh Dios nani ruscuecdxilajz bejn siojb guta'cwini bendxab xhan ni'tu. Gacnäj Dad Jesucrist la'tu.

<sup>21</sup> Timoteu nani racnäj narä lo dzuun, ruxhal xtixtios lojtu. Lucio, Jasón, nájza Sosípater, beñ ladxä, ruxhalza xtixtios lojtu.

<sup>22</sup> Najrä Tercio, ni cagucuaä guijtzre xcuent Pabl, ruxhaläza xtixtios lojtu xcuent Jesucrist.

<sup>23</sup> Ruxhalza Gayo xtixtios lojtu. Rbääznu rolijzni, luxh rudeedzani rolijzni guidxagsa' reben guidoo. Ruxhalza Erasto, ni najc tesoreer xten guejdxre, xtixtios lojtu, sigajcza bejtznu ni laa Cuarto.

<sup>24</sup> Gacnäj Dad Jesucrist la'tu. Sugacni si'c.

### *Rediidx lult xten Pabl*

<sup>25</sup> Colguiliä'p xpala'n nani sajz gusudzu'tz la'tu loj xtiidxni nani basule'ä, nájza loj xtidx Jesucrist xcuent rexhigab ni naga'tz galooli, <sup>26</sup> naj abaluiloj rediidxga lojtu; nájza xcuent ni bacuaa reprofet galooli; si'c najc diidx

ni bia'n Gueb Dios ni nabaj<sub>n</sub> par tejpas loj rexpejn<sub>n</sub>i,  
agusule'ni loj guiraa reben<sub>n</sub> guedxliuj, te gusoobreni diidx  
sa'csi rililajzreni xtiidxni, <sup>27</sup> colguiliä'p xpala'n ni najc  
tejtis Dios ni nanduxh. Suguiliä'pnu xpala'n Dios xcuent  
Jesucrist. Guiliä'pnu xpala'n Dios par tejpas. Sugacni si'c.

## **Xtidxcoob Dios ni biändä dad Jesucrist New Testament in Zapotec, Mitla (MX:zaw:Zapotec, Mitla)**

copyright © 2006 Wycliffe Bible Translators, Inc.

Language: Zapotec, Mitla

Translation by: Wycliffe Bible Translators, Inc.

Zapoteco, Mitla [zaw], Mexico

### **Copyright Information**

© 2006, Wycliffe Bible Translators, Inc.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

### **The New Testament**

in Zapotec, Mitla

© 2006, Wycliffe Bible Translators, Inc.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

---

PDF generated using Haiola and XeLaTeX on 27 Jul 2022 from source files dated 28 Jun 2022

5cff1274-8dc3-5398-a94d-f6033bb363c9